

倘  
湖  
樵  
書

倘湖樵書二編卷之十二目錄

蕭山來集之元成父纂輯

取民之法流弊

尸諫

梅梁

農家測天

蜃樓之外另有虛市

天神現形

自然符印自然方藥

浮山浮墩浮田

附浮星

化石

有志之士

投崖至孝

泉石草本公而不私

物有本小而特大者

物有本大而或小者

雷能生物

知道者不言命相

古今勝蹟尤可追尋

茶與韭墨相反

因敗爲功

昔賢有當時無名而後世反得其名者

三十六七十二之數

以設官爲戲

遺骨之異

人之元神

取民之法流弊

取民之法多端雖流弊于後代而實濫觴于古昔金  
壘子云周禮凡民之貸者與其有司辨而授之以國  
服爲之息盱江何氏集註謂民有貸物于官者與有  
司辨其物定其價以授之還本之後服役于國中各  
有日數以爲息所謂以國服爲息也按王充云貧人  
負官重責貧無以償則身爲官作責畢竟是漢人之  
法猶有周官泉府遺意耳此法雖出于便民然而流  
弊遂有宋人青苗矣 洪容齋云隋書志晉自渡江

凡貨賣奴婢馬牛田宅有文券率錢一萬輸估四百  
入官賣者三百買者一百無文券者隨物所堪亦百  
分收四名爲散估歷宋齊梁陳如此以爲常以人競  
商販不爲田業故使均輸欲爲懲勸雖以此爲辭其  
寔利在侵削也今之牙莽投稅正出于此田宅所係  
者大奉行惟謹至于奴婢牛馬雖著于令甲民不復  
問然官所取過多并郡邑導行之費蓋百分用其十  
五六又皆買者獨輸故爲數多者率隱減價值除立  
歲月坐是招激訐訴無已時矣此乃近日稅莽之濫

觴至有奸民生事所立文券未幾而卽以匿稅投告  
官或謂其有利已而行紛紛多事不堪言矣 通考  
曰市者商賈之事古之帝王其物貨取之任土所貢  
而有餘未有國家而市物者也而市之說則效于周  
官之泉府後世因之曰均輸曰平糴曰和買皆以泉  
府藉口者也糴者民庶之事古之帝王其米粟取之  
十一所賦而有餘未曰國家而糴粟者也而糴之說  
則倣于齊桓公魏文侯之平糴後世因之曰常平曰  
義倉曰和糴皆以平糴藉口者也

尸諫

史魚尸諫古今流爲美談漢武故事上常輕服微行  
公孫弘數諫勿從弘謂其子曰吾年已八十餘陛下  
擢爲宰相士猶爲知己死況不世之主乎今陛下微  
行不已社稷必危吾雖不及史魚冀萬一以屍諫因  
自殺上聞而悲之自爲誄 嘉祐間殿中侍御史陳  
洙字思道同知諫院司馬光上疏乞選宗室爲皇嗣  
仁宗令以所言送中書而光欲出自上意洙曰若俟  
上自言當在何時遂上疏極陳東漢建儲不早之弊



杜喬李固徒取誅戮無益于事且曰陛下以臣懷異  
日之圖莫若殺臣之身用臣之言疏方上卽仰藥死  
以自明其無所冀奏下大計遂定司馬光疏陳其事  
仁宗賜沐錢十萬元祐初光復言乞除其一子官以  
旌忠義哲宗從之 永樂間董阜民字德之德興人  
明經任工部主事質直方毅不爲容悅時同官有被  
譖繫獄者阜民疾篤恐其罹刑置諫疏于懷死都門  
上憐其死諫命禮葬之遂赦被譖者夫明主不自開  
悟而致其臣以死諫其情寔可憫若其事遂行則忠

覓猶瞑目于九幽耳余故列記數事以見千古原不  
乏史魚也按裴晉公傳臨終自爲銘志帝怪索之得  
半稿以儲貳爲請則幾幾乎語不及私者矣若林逋  
所詠茂陵他日求遺稿尤喜曾無封禪書則又以不  
諫爲諫者焉

按韓詩外傳昔者衛大夫史魚病且死謂其子曰  
我數言違伯玉之賢而不能進彌子瑕不肖而不  
能退爲人臣生不能進賢退不肖死不當治喪正  
堂殯我于室足矣衛君問其故子以父言聞君造

然召還伯玉而貴之而退彌子瑕從殯于正堂成  
禮而後去生以身諫死以尸諫可謂直矣詩曰靖  
共爾位好是正直

三國吳郡疇字溫伯山陰人爲郡功曹孫皓時太守  
郭誕以不白妖言被收追還無以自明疇進曰疇今  
在明府何憂遂詣吏上疇詞皓怒猶盛疇恐誕卒不  
免遂自殺以證之臨亡置辭曰疇生長邊陲不閑教  
道得以門資廁身本郡逾越儕類位極朝右不能贊  
揚盛化養之以福令妖說橫興于國亂紀疇以嚆噉

之語本非事實雖家誦人詠不足有嫌天下重器而  
匹夫橫議疾其醜聲不忍聞見欲含垢藏疾不彰之  
翰筆鎮躁歸靜使之自息愚心勤勤每執斯旨故誕  
屈其所是默以見從此之爲愆寔由于疇謹不敢逃  
死歸罪有司惟乞天鑒吏收疇喪得詞以聞誕遂獲  
免皓嘉疇節義詔郡國圖形廟堂 後漢書靈帝光

和元年初開西邸賣官自關內侯虎賁羽林入錢各  
有差私令左右賣公卿公千萬卿五百萬中平二年  
中常侍張讓趙忠說帝歛天下田每畝十錢以修宮

室又令西園驛分道督趣刺史二千石及茂才孝廉  
遷除皆責助軍修宮錢大郡至二三千萬餘各有差  
當之官皆迫遣之時北鉅鹿太守司馬直新除以有  
清名減責三百萬直被詔悵然曰爲民父母而反割  
剝百姓以稱時求吾不忍也辭疾不聽行至孟津上  
書極諫當世之失書奏卽吞藥自殺帝爲輟絕修宮  
錢 漢哀帝時丞相王嘉以薦梁祖又封還益韋賢  
尸事帝怒召詣廷尉嘉不肯咀藥自詣廷尉吏詰問  
嘉嘉對爲國惜賢無所私吏稍侵辱嘉嘉喟然仰天

嘆曰幸得充備宰相不能進賢退不肖以是負國死  
有餘責吏問賢不肖主名嘉曰賢故丞相孔光大司  
空何武不能進惡高安侯董賢父子佞邪亂朝而不  
能退罪當死死無所恨嘉繫獄二十餘日不食嘔血  
死此乃真有史魚之風云

## 梅梁

霏雪錄云禹廟梅梁乃大梅山所產梅樹也山在鄞縣東南七十里蓋梅子真隱處石洞仙井丹竈藥爐猶存山頂大梅樹其上則爲會稽禹祠之梁其下則爲他山堰之梁禹祠之梁唐張僧繇畫龍其上夜大風雨嘗飛入鏡湖與龍鬬人見梁上水淋漓濕萍藻滿焉始駭異之乃以鐵索鎖于柱他山堰之梁長三丈許去岸數尺歲久不朽大水不漂因刀墮誤傷之出血不止今禹廟以他梅樹代之不斷不削存故事

耳非舊物也 會稽志云梁季修廟忽風雨大至湖  
中得一木取以爲梁乃梅梁也 金陵覽古云晉孝  
武太元三年僕射謝安作新宮太極殿欠一梁有梅  
木流至石頭城下取用之 畫梅花于梁上表瑞因名  
梅梁殿 蘇州記云淹梅溪昔有梅樹吳國采爲姑蘇  
臺後忽于此沉今湖州側猶有梅溪云名勝志太湖  
夫椒山東有梅梁湖吳時進梅梁至此舟沉失梁至  
春首則水面生花今之梅樹其可爲梁者甚少而况  
作太極殿之梁與姑蘇臺之梁乎若夫梅山之樹上



可作古廟之梁而下作他山堰之梁猶長三丈許固  
是神物不待其鬪龍出血而始爲異也 按會稽志

漢武帝時民以愆旱災蝗祈王雱山輒應乃相率至  
觀既構殿少中梁忽一夕風雷太作明旦霽乃天降  
白玉梁一于殿上光彩瑩目因號玉梁觀至魏武遣  
使取之去觀九里午時雷霆裂殿梁化爲黃龍乘雲  
而去則會稽勝蹟又不特梅梁也 湧幢小品云梅

湧湖在姚江之北有梅龍舊經云谿有古梅吳時作  
姑蘇臺伐以爲梁而存其根產木成塢有巨木臥湖

心水潤不露人由此神之曰梅龍蓋梅梁之根云秋  
七八月雷雨交作有聲如鼙吼聞數里土人相傳梅  
龍顧于十道志吳造建鄴宮始取材至明堂谿見古  
梅其材中梁取以還都梁已具無所用之一父梅忽  
飛還土人異之號曰梅君今在湖中隨水浮沉一云  
會稽禹廟梁卽此木 述異記會稽山夏禹廟中有  
梅梁忽一春而生枝葉

農家測天

風雨霜露之事老農諳習已久其所測天時比于保章挈壺爲尤確切蓋由來傳習而徵驗之故也 後

山談叢云春之風數爲夏之雨數小大緩急亦如之  
諺云行得春風有夏雨 鷄肋篇云江南人謂社日  
有霜必雨丙辰春社繁霜濃毛次日果大雨 陸象  
山云泉之盛一甲子而止動早則及夏淺動晚則入  
夏溪泉與雨澤亦相表裏故動早早徵動晚稔徵今  
先啓蟄而動則不及夏矣 黃河隨時漲落自立春

後解凍候人量水初至凡一寸則夏秋當至一尺頗  
爲信驗謂之信水非時暴漲謂之客水 研北雜志

云世謂正月三日爲田本命浙西人謂之夏正三言

夏正之三日俗以是日秤水以重爲上則有年極驗

楊子江中沙田田戶每歲旦取水一瓶以秤水水

重則是年江水大輕則水小歲歲不差 湧幢小品

云春雪不宜過多多則百廿日必有大風雨俗謂之

雪報最傷農 羣 方譜云霜降日見霜則清明日霜

止或前或後日數 同若霜降一日前見霜則知清

明一日前霜止霜降後一日見霜則知清明後一日  
霜止五日十日而往前後同占也田家出秧必待霜  
止甚驗 十月霧爲沫露主來年水大相去二百單  
五口水至須看霧着水面則輕離水面則重 朝野  
僉載春雷始鳴記其日數滿二百十日霜必降又曰  
雁從北來記其日後十八日霜降 三月雪不消則  
九月霜不降 重九日晴則冬至元日上元清明四  
日皆晴雨則皆雨 夏至有風三伏熱重陽無雨一  
冬晴此古諺也又有云夏至酉逢三伏熱重陽戌遇

一冬晴康熙丙辰九月九爲戊子是日又無雨故一  
冬皆晴 補筆談云世俗十月遇壬日北人謂之入  
易吳人謂之創布壬日如本月癸日差溫類九月甲  
日類八月如此創布之直至辛日如十一月遇春秋  
時節卽溫夏卽暑冬卽寒辛日以後自如時令此不  
出陰陽書然每歲候之亦時有准 研北雜志云冬  
至後九日遇壬法當有年 鶴林玉露載范石湖詩  
云朝霞不出門暮霞行千里今晨日未出曉氛散如  
綺心疑雨再作轉眼雲四起我豈知天道吳儂諺云

爾古來占滂沱說者類  
祇詭飛雲走羣羊停雲洛三  
稀月當天畢宿風自少女起爛石燒成香汗礎開如  
洗逐婦鳩能拙穴居狸有智蜥蜴啣冰雹蟬蛸若春  
杵垤鳴東山鶴堂審南柯蟻或加陰石鞭或議陽門  
閉或云逢庚變或自換甲始刑鷺與象籠聚訟非一  
理不如老農諺影響捷如鬼哦詩敢誇博聊用醒午  
睡予乃增補二句云日占出海時月驗仰瓦體蓋諺  
有云日出早雨淋腦日出晏晒殺雁又有云片如懸  
弓少雨多風月如仰瓦不召自下 夏雲起自西南

者雨必多諺云西南陣過也落三寸 上風雲雖開

下風雲不散主雨 初下霜一朝卽止者謂之孤霜

主來年旱連朝以上者豐上有鎗鏃者吉平者凶

有利無利但看四月十二言此日宜晴也有穀無穀

但看四月十六言此日宜雨也 伏裏西北風臘底

無不通 六月一日一天雨夜夜風潮到立秋 頭

芽生子沒殺二芽二芽生子旱殺三芽



蜃樓之外另有虛市

沙門島相聯屬有鼉磯牽牛大竹小竹四島紫翠巉  
絕出沒於波濤之表真神仙所宅也蘓子瞻云海市  
現滅時在數島上吳興慎蒙曰海市春夏見秋冬少  
見大霧後天晴見天陰不見微風與無風不見大風  
不見風微急其見也速而巧風微緩其見也遲而拙  
蘓公見之于歲晚故長歌以志喜慎公見之于孟夏  
故窮奇盡變作爲記而淋漓曲暢焉乃亦有不必于  
海不必于蜃而平野之中能成墟市亦學者之所當

漢考也

太史公天官書固云海旁蜃氣象樓臺廣

野氣成宮闕然雲氣各象其山川人民所聚積 歐

陽公嘗言謫官夔陵時舟泊漢江野岸中夕後聞語

言歌嘯老幼男女甚衆亦有交易評議及賣果餌之

聲若市井然迨曉方止翼日步于江畔曠無人跡但

遙見一蕪城基址詢舟人云古隋地也 汶上縣石

門治在縣西南 十里周迴三十里每秋水泛漲一

望無際遙觀村落在烟波杳靄中又常有版樓人馬

之狀出于水上謂之水市洵奇觀也 闕亭在南旺

湖中高阜六七層自隱桓以下皆墓于此至今水際  
時見烟雲樓臺之狀 東阿縣東南有桃城縣今爲  
桃城鋪鋪旁一丘高可數仞每陰雨後隱隱有市井  
車馬形土人以爲蜃市云 避暑漫抄云嶺表海邊  
時有鬼市半夜而合鷄鳴而散人從之多得異物夜  
半爲市正可與日中爲市相對 拂菻國西海有市  
貿易不相見置直物旁名鬼市亦此類 廣西名勝  
志云瑞象山在來賓縣西瑤光臺記云郡之四山聳  
秀葱翠四時寒暑陰晴變態不一當其天宇澄霽倏

爾暝濛濛日朝暾遊雲間出悉爲白象之形宛若生

成奔逐飄逸于西山上說圖識餘徐中行翊叅政

廣西出象洲計此必多象舟人云此絕無象及早行

見山崖水次白象以千數或趨或臥其狀不一舟人

曰山氣所結日高當不見及日出象果散滅無一存

者七修類藁陝西郊外忽日起烟霧漸有人物車

騎之形又聞松江春霽時亦復有樹木屋舍歐陽

少師又言爲河北都轉運使時冬月按部至滄景間

于野亭夜半聞車馬聲幾達旦不絕彼處人云

此海神移徙五七年間時有之 郎仁寶云毛翎登  
州老醫言土人捕魚海中去遠見有城府便往艤舟  
見城欹側半陷水中城樓上有榜曰青州白浪縣字  
猶可識水際腥膻膸無數見人亦不畏俯而擒之所  
得甚多歸語人往杳不可尋 山西名勝志定襄縣  
或云夏后氏所築又曰趙襄子所築俗傳朝霽時雲  
霧之中呈現樓堞 繁峙縣東百里鹵城故福都也  
周圍三百一十一步正東及西南東北呈現樓堞門  
內似有人馬現則多兩人在西則現在東不見遠則

分明近則隱沒近東五里有齊城其隱見亦同今不復見見則凶 名山記五臺山有乾闥婆城卽化城也每于日欲出時城乃現 自倣篇云唐開元未登州漁者負擔行海遼遙見烟霧蒙籠人衆填雜若市里者遂前見多賣藥物僧道尤衆良久欠伸悉無所見拾得青黛數十枚升許大不敢他用而施之浮圖式如手抄云建昌府歐陽氏西閣子壁上時時幻出樓閣簾櫳種種諸狀中一少女橫榻而坐晝清人俏羅幃半開丰姿妍冶代所未有或加足于膝以邪

幅纏之微作約繡通林之狀紅窗密然人若迫視則  
漸移身映入幃中久之漸隱少頃都無跡矣主人以  
爲妖竟錮其室後不知如何 五燈會元有無邊際  
樓閣雲 湧幢小品高唐州驛舍夜有鬼物自空中  
過車馬人畜之聲一一可辨亦曰海市 閩書福寧  
州筆架山在大金海中嘉靖四年四月廿三日南海  
浮來五山自筆架山外而至峰巒突兀上有草木人  
馬往來貿易闔城聚觀自午踰申乃沒蓋海市也海  
市現于登萊海中而偶見于寧州海中者如此

閩書寧德縣隱仙嶺地名冲裏中有石室號鬼洞年  
豐則鬼嘯景泰二年有彭翁者醉行過嶺睡臥亭中  
羣鬼相語具燈燭送之扶翁以歸邑人會同令陳琯  
記予以嘉靖四十二年壬戌四月在筠竹棚蕪家夜  
方就寢下床人曰今夜更鼓響亮予傾耳聽之正發  
插定更也是夜心事淒涼亦不成寐聞其更更傳遞  
甚明至五鼓煞插俱如譙樓然筠竹去冲裏十餘里  
鼓聲在百步之內此予所親聞也非又一墟市與

文獻通考宋紹興二十年十一月建昌軍新城縣丞



安村風雪大作夜半若數百千人行聲語笑歌哭雜  
擾匆遽而凝寒陰黑咫尺莫辨窺之無所覩明日雪  
溪有人畜鳥獸跡流血污染十餘里入山乃絕後  
漢書光武建武三十有二年封泰山封禪儀曰車駕  
十九日之山虞國家居亭百官布野北日山上雲氣  
成宮闕百官並見之月令通考汝南臨汝縣南十  
八里廣成陂西垠有小山曰崆峒若九秋三春晴麗  
必有毒霧起山崑彌亘數里樓殿轆轤花木爛然數  
息而止時謂廣成子化城槎庵小乘長沙益陽去

府治三百餘里益水中時見長沙城隍人馬形色悉  
可審辨或停鵬移晷乃漸散滅 高郵州有一寺講  
堂西壁枕道每日晚人馬車輿悉透壁上衣紅紫者  
影中鹵莽可辨壁厚數尺辰午之間則無 唐國史  
補凡海上居人時見飛樓如締構之狀甚壯麗者太  
原以北晨行則烟靄之中覩城闕狀如女墻雉堞者  
皆天官書所說雲氣也 廬山三石梁長數十丈廣  
數尺下望無底咸康中庾亮過梁見老公殊偉厦屋  
崇峻奇塔崇竦莫測何境循玩久之拜謝而退

天神形現

帝王之道天監日臨陟降左右詩曰敬之敬之天惟顯思此其道也豈必空中真有其形像哉後世或矯誣下民或神道設教靈通活現見諸史冊遂爾傳疑讀之者亦在恍惚之間卽真有見亦在敬而遠之之列不然姑存而不論可耳 天寶七載十一月十二日餘杭郡慶雲見化樓閣勢兼有仙人形象十四載三月南道觀察使源涓奏江陵郡古紀城東有紫氣成雲中有一人衣白衣乘雲氣向上其時安南招討

使康令謙及同行軍將等同見 宋史宣和四年北方用兵玄武見于雄州正寢有龜大如錢蛇若硃漆筋相逐而行宜撫使焚香再拜以銀奩貯二物俄俱死 金史天會九年太宗方御西樓聽政聞咸州所貢白鵲音忽異常起視之見東樓外空中有像巍然高五尺許下有紅雲承之若世所謂佛者上乃擎跪修虔久之而沒 鐵圍山叢談宣和己亥夏都邑大水幾冒入城隅高五七丈久方得解時泗州僧伽大士忽見于大內明堂頂雲龍之上凝立雲中飄飄然

吹衣爲勅旁侍惠岸木叉皆在有白衣褰跪于僧伽  
前若授戒諭狀莫識何人萬姓咸覩迨夕而沒白衣  
者疑爲龍神之徒爲僧伽所降伏之意上意不樂

清波雜志龍圖閣直學士提舉醴泉觀兼侍讀編修  
國朝會要詳定九域圖志編類玉輦禮制局詳議官  
蔡攸奏臣伏承聖恩差冬祀大禮陞輅執綬十一月  
五日陛下御玉輅自太廟出南薰門至玉津園蒙宣  
諭臣曰玉津園東樓殿重複此是何處臣對以城外  
無樓殿恐是齋宮陛下曰此去齋宮尚遠可回顧果

見雲間樓臺閣數重旣而審視其樓殿去地數十丈  
卽知非齋宮俄頃陛下又曰見人物否臣卽見有道  
流童子持幢幡節蓋相繼而出雲間人漸衆約千餘  
皆長丈餘有輅車輿輦多青色駕者不類馬狀若龍  
虎及後有執大枝花數十相繼雲間日色穿透所見  
分明衣服眉目歷歷可識人皆戴冠或有類今道士  
冠而稍大者或若童子狀皆衣青紫黃綠紅或淡黃  
杏黃淺碧望之衣上或有繪繡或秉簡或持羽扇前  
後儀衛益衆約數千許人廻放于東方稍南人物異

常旌旗飛翻飄轉所持幢高數丈非人世所覩移刻  
或見或隱又頃乃隱此蓋陛下恪祗祀事神明昭格  
示現伏望宣示史館布告天下太師蔡京等奏乞率  
百僚稱慶隨降詔以其日爲天應節時政和三年十  
一月癸未也 都穆云予遊茅山沈靈官開宴言歲  
庚戌三月望辰刻三茅君現形大茅峰西足躡祥雲  
金光繞身食頃而散見者數百人或曰茅君現形其  
衣皆雲氣所爲無眉目也 曲江縣志錄異云曲江

城西門樓有關帝廟其來舊矣歲在順治丙申五月

二十日未申時分秀才黃忠德遊芙蓉山歸雜在渡船中並隔岸居民見樓上毫光炫耀帝披金甲藍紗巾立樓牖面北少頃面轉西而退見者且驚且拜至二十一二十四二十五三十日依時復現次年七月初十十二十四依時或黃蓋或二將隨後見者不啻千萬人夫自漢迄今一千八百八十五年現身如常從古所未聞也 眉公見聞錄熊公尚書猗其先必清常于城東見雲擁觀音溪以爲異感而結祠祀焉公少業南壇從游者十人忽夕覩一絕色女立松樹



上衆皆錯愕走公畧不爲意女滅焉遂以刀刮樹皮  
大書曰作怪風雷折成形斧鋸分明日夜半雷擊之  
爲兵部左侍郎時一日奏事鼻帶液 孝廟曰鼻液  
乃膝寒耳命以宮繡護膝賜之公死之日童孺四人  
與郡學郭生顧生立靈星門忽聞天鼓響見天門雲  
光爛開有袍笏一人騰而上不移晷傳公逝 代醉  
篇通鑑載道君問林靈素願見真武聖像靈素口容  
臣同張淨虛天師奉請乃宿殿致齋于正午時黑雲  
蔽日大雷霹靂火光中見蒼龜巨蛇塞于殿下帝祝

香再拜曰願見真君幸垂降鑒霹靂一聲蛇龜不見  
但見一巨足塞于殿下帝又上香再拜云伏願玄元  
聖祖應化慈悲既沐臨降得見一小身不勝慶幸須  
臾遂見身長丈餘端嚴妙相披髮皂袍垂地金甲大  
袖玉帶腕劍跣足頂有圓光結帶飛繞立一時久帝  
自能寫真寫成忽不見次日安率醮謝蔡京奏云竊  
恐真君未易降于人間昔日太宗皇帝曾命張守真  
請降亦有諸本藏于閣下乞取對之可見真僞乃宣  
取展看與見本並無差殊帝愈悅 周書盧光字景

純博覽羣書好玄言性崇佛道至誠信敬嘗與太祖  
待于檀臺山獵圍旣合太祖遙指山上謂羣公等曰  
公等有所見否咸曰無所見光獨曰見一桑門太祖  
曰是也卽解圍而還令光于沙門立處造一浮圖掘  
基一丈得瓦鉢錫杖各一太祖稱嘆因立寺焉 南  
史南昌滕曇恭年五歲時母楊氏患熱思食寒瓜土  
俗所不產訪不能得銜悲哀切俄一桑門曰我有兩  
瓜分一相遺還以與母舉室驚異尋訪桑門不知所  
在及父母卒水漿不入口者旬日感慟嘔血絕而復

蘇隆冬不着繭絮蔬食終身每至忌日晝夜哀慟門  
外有冬生樹二株忽有神光自樹而起俄見佛像及  
夾侍之儀容光顯著自門而入家人大小咸共禮拜  
久之乃滅 開寶遺事張開爲荊州刺史至郡界風  
雨晦冥不辨面目惟聞空中有殿鳴聲相次雲中有  
雲輦數甲冑十數人開問故曰某荊州內外所主神  
仙使君令各相率迎引到任謁廟後各致謝及建飾  
廟貌自此政譽尤善

自然符印自然方藥

立方合藥以治病此岐黃之傳而醫者之常若夫道術胡僧符祝法水加之而痛者止臥者起則上古亦有祝由之科未足深訝至于不假人力而天成之符篆方藥皆具抑亦異哉所聞矣 吳船錄云自瀘州

百二十里至合江縣對江安樂山出天符木葉設有符篆 名勝志云博羅縣雙髻峯有劉仙壇石壇高百丈許唐劉瞻修真處其旁生竹葉符鎮壓蛇虎

日華瑣碎錄云峽州玉泉鬼谷子洞前有叢竹葉有

文成符葉葉不同佩之可以辟患 鬼谷先生傳云  
楚有清溪在遠安縣下溪千仞其水靈異卽郭璞詩  
清溪千餘仞者溪旁有寺竹葉上多生符篆文俗名  
鬼谷符 名勝志又云雲南縣清湖之西官道中有  
石成文如古篆籀色如丹砂號曰地符行人謹避莫  
敢踐之 丹鉛錄云莆田陳巖山有自然仙篆以紙  
摹形類禹篆 四川名勝志云廣安州篆水在州東  
北五里渠江曲尺灘下石磧平坦冬月水涸磧露仲  
春水生磧沒溪不盈尺日光照映金波透徹其年若

登則紋宛成篆繡濤澗波面其見不常邦人以之卜  
歲 丹霞子記湖廣天岳山有石壁篆文 近點蒼  
山有赤文島云是大士賣地券字如蟲篆不可辨

南溪縣平蓋山漢真人劉景鶴隱此至魏武時始跨  
鶴仙去有石洞深邃不測中有小穴圓如蓋有水出  
焉山上有木生葉其紋如篆名符葉 合江縣安樂  
山有天符葉樹一夕大風雨拔去後得於容子山葉  
如荔枝而長上有紋宛如蟲篆或以爲劉真人仙跡  
吳天璽神識碑東觀令華嚴文皇象書其畧云于

臨平湖邊得石璽青白色長四寸廣二寸刻上作皇帝四字于是改元天璽云然則璽亦有自然而成者豈特符哉 湖廣安化縣有印石方廣百十丈上有印文遇雨卽現 湧幢小品邕宜以西南丹諸蠻皆居窮崖絕壁間有獸曰野嶠黃髮椎髻跣足裸形上下山谷如飛猿自腰以下有皮累垂蓋膝若犢鼻力敵數壯夫遇男子必負去求合或刺殺之至死以手護腰間剖視得印方寸瑩若蒼玉字類符篆不可識 峒嶠神書鼠印合歡註云雄鼠外腎之上有文似



印兩腎相對有符篆朱文九遍者尤佳以十一月  
或五月五日七月七日正月朔旦子時而北向子位  
刀剖取陰乾如篆刻下佩于青囊中男左女右繫臂  
上人見之無不懽悅所求如心又治烏腋下有鏡印  
述異記城陽縣南有堯慶都墓廟前一池魚頭間  
有印文謂之印頰魚若非祀者捕而不得 海語云  
印魚出南海中似青魚而修廣過之頭骨拆如解顱  
之嬰腦後垂皮方徑三寸許若道巾之披餘然上有  
黑文儼如篆籀島嶼間有獲者必珍藏之

雲仙雜記幽燕思先驛後有五樹檜忽生藥圃試摘服之往往療疾有驗 名勝志云漢夏侯詵侍母疾衣不解帶者二年徧覓藥方不得天降仙藥于其屋後桑枝上按訖河南寧陵縣人 扁鵲墓在湯陰縣伏道村鵲秦人聖子醫爲同輩所嫉刺殺于此祠堂碑刻列于墓左墳上土可療疾禱而求之或得一小丸如丹劑服之旋瘥揮塵新談又云扁鵲墓在任丘縣其祠名藥王祠祠前有地數畝病者禱神以攻卜之許則基從某方取藥如言取出果得藥無勿愈者

其色味不一四方來者日擲千窟明日俱平壤矣

潞安府襄垣縣仙堂山上有龍洞及仙堂寺山岡有  
琉璃巖巖中有石如人又有石九圈如車輪環水其  
中雖旱不涸前有隙地生石子藥丸隨人採取去則  
復生 將樂縣玉華洞石函有五色石丸光瑩圓淨  
如梧桐子是赤松子採藥處遺藥救人旋取旋有

登真隱訣云委羽山天下第二洞天號大有空明之  
天青童君之所治也地所產石無大小百碎皆方煮  
湯服之可以愈疾 文獻通考云勃泥國有藥樹取

其根煎爲膏服之及塗其體兵刃所傷皆不死 夢  
溪筆談云國子博士李餘慶強于政事果于去惡死  
葬于橫山人至今畏之過墓者皆下有病瘡者取其  
墓土着床席間輒差 談藪云大溪山在廣州境舊  
山有一洞其處所人不常識每歲五月五日洞開則  
見之士人預備紙墨刷帚入其中以手摸石壁覺有  
罅隙若鐫刻者以墨刷其上印模而出持所印紙視  
之或咒語或藥方所得皆不同亦有不成字無所得  
者咒術藥方應用無不效驗蓋南法之所出

浮山浮墩浮田 附浮屋

山靜物也而有浮山浮則動矣墩與田附地而靜者也乃有浮墩浮田浮則動矣世人知靜中之動然後知動中之靜也 名山志云浮山一名浮渡山在桐城縣東週廻五里高三里其西南獨峯直上千仞大江環繞其勢若浮故名按符音同涪浮亦音符與涪通用浮山者自地視之如蓄自江視之若浮不峻不麗巖壑相屬其中石態屈曲殊觀有巖三百有五十峰七十有二焉今屬安慶府桐城縣 水經注云郎

水出浮岳山山躡一處則百餘步動若在水也因名  
浮岳山今在韶州府始興縣 名勝志云浮虛山在  
香山縣七十里海中隨波上下故名今在廣州香山  
縣舊經云羅山脈自大庾嶺來距番禺東二百里上  
有桂樹神湖山海經桂林八樹在番禺東卽此浮山  
乃蓬萊之一島堯時自合稽浮海而至與羅山合而  
爲一今在博羅增城之間吳元穎古跡記云浮丘山  
在海內西本羅山朱明之門戶浮在水中篙痕宛然  
今去海四里 名山記云盱眙縣浮山在縣西一百

四十里北臨淮水一名臨淮山山下有穴去水一丈  
淮水泛溢其穴卽高水減其穴還低頂上有浮空亭  
蘇東坡詩人言此地是齋宮升降隨波與海同共坐  
船中那得見乾坤浮水水浮空 山堂肆考云浮槎  
山在廬州府城東相傳自海上浮來昔有梵僧過而  
指之曰此耆闍一峯也 此與桐城浮山當是一山 侯官縣更有  
浮峯山屬光俗里每潮盈則山浮 慎蒙名山記云  
新羅神文王時東海中有小山浮水隨波往來王異  
之泛海入其山上有一竿竹命工作笛吹此笛則兵

退病愈旱雨雨晴風定波平號萬波息笛歷代傳寶  
之至孝昭王加號萬萬波波息笛今亡拾遺記云  
洞庭山浮于水上其下有金堂數百間王女居之四  
時聞金石絲竹之聲微于山頂楚懷王之時與羣才  
賦詩于水濱故云瀟湘洞庭之樂令人難忘雖咸池  
九招不得比焉廣西賀縣浮山挺出江中雖洪濤  
泛漲此山不沒一統志楊州府城西南隅有浮山  
高三尺長四丈五尺濶丈餘其狀似鐵不生草木以  
其浮于地上故名一統志夏禹廟又泰州西北五里



有羅浮山在澤藪中不爲水所沒遠望如羅浮故名  
又平陽府有浮山因置浮山縣相傳洪水時其山  
隨水消長故名 荊州府境有地肺以荊州濱江西  
岸洪潦常浮不沒故名地肺 湖廣府城南浮玉山  
離城五里玉湖中巨石如積坡陀硯礪不以水盈縮  
爲高卑故名

南康縣西有浮石形如覆鐘水環其外東坡詩浮石  
已乾霜後水 湖廣橘洲在善化縣西四里上多美  
橘湘江中有四洲夏月水泛漲惟橘洲不沒諺云湘

潭無底桶洲浮 江西上高縣蒙山洞有兩洞上洞  
不可遊下洞可遊溪不可窵又有石立岩間上下無  
所附謂之無根石 衢州浮石潭在府治北五里有  
石高可丈餘水大漲亦不沒唐白居易詩浮石潭前  
停五馬或作浮樓上得雙魚 臨海縣有飛霞石古老  
相傳仙人上昇于此石累三層牧豎戲于其上以手  
轉之不能

湧幢小品云蘓州葑門內有土阜對峙水中雖巨浸  
弗沒號曰浮墩相傳此地昔有雙松叅天建炎狄難

潰兵欲伐之隕石如雨乃止亦靈境也 宋方勺泊

宅篇云河陽三城南北皆受水患惟中潭屹然如故  
相傳此潭隨水高下如浮玉地肺之類楞嚴經以乾  
爲洲渾濕爲巨海是也 慎蒙云雲南洱海有四洲

其鵲洲隨水升沉 名山記云建安縣有浮石洞蓋

溪中小嶼遇泛則與之俱浮人未嘗見其沒相傳漢

梅福煉丹前山其徒陳先生者每竊食焉福怒拔劍

逐之遂逃入洞中福曰此吾丹之功也遂釋之故又

名逃奴洞 名勝志云靈洲在廣東封川縣廣一里

長五里江流四合雖洪水漲溢不沒古傳與水相浮  
沉故以靈名上有荔枝庄

水經注云交趾有雒田其田從潮水上下民墾食其  
田因名爲雒田 閩書薤菜蔓生花白莖中虛摘其  
苗土壓之輒活 一名薤菜遜齋閒覽本生東爨古倫  
國蕃舶以薤盛之故名薤菜漳人編葦爲筏作小孔  
浮水上如萍根浮水面莖葉皆出于葦筏孔南方奇  
蔬也此亦浮田之類 玉堂閒話云廣州番禺縣常  
有部民謬訴云前夜亡失蔬圃今認得在于某處詣

縣宰判狀往取之有北客駭其因詰之民云海之淺  
水中有藻荇之屬被風吹沙與藻荇相雜其根既浮  
其沙或厚三五尺處可以耕墾或灌或圃故夜或被  
盜者盜之百餘里外若浮筏之乘流也以是植蔬者  
海上往往有之

河南確山縣有確山世傳何曾見此山有曰杵自動  
有聲取之不出又謂之浮石嶺

名勝志

湖廣黃岡縣

崎山有大小二崎小崎有飛來石其下石柱推之可  
轉而不仆餘杭徑山舊志有方僧與國一禪師說

法僧曰此有頑石汝能叱之使下乎師曰吾能使之  
上不着天下不着地乃大聲喝之其石隨而上復喝  
之石隨而下近年縣令王某以絲線徹底經之與石  
座無毫髮沾染其神異如此 候官縣城門山有飛  
來石其大可高數丈餘離地二三寸有數小石如鴨  
卵支其下默而推之則動或預語往推離數十人共  
力不動也 同安縣薛嶺臨海有動石在貧營港口  
潮至則自動又有浮沉石潮漲其石不沒潮退則石  
沉海底人以爲異 漳州雲溪龍洞山有風動石虛

出絕崖撼之卽動剛風亦然正德志云山頂有風動石高五丈濶一十八丈下有大石盤閤之此石四面均不偏倚其下適兩尖相當故風來則動

廣德州建平縣舊有浮城其城中有古樹莫能名斧之則淋漓如血其地極窪每夏潦暴漲諸圩悉沒惟此城巋然似浮在水

慎蒙名勝記朝鮮萬瀑洞上有峯曰獅子岩洞有普德窟鑿絕壁架板立銅柱于外構小屋三楹于上名觀音洞拘以鐵鎖釘于岩石浮于空中人登則搖中

置佛函外施鐵網以防手摸夫張志和所云浮家泛宅浮于水上有水可憑此屋浮于空中斯爲異耳耳談云渾源州倒馬關外有嶺峭削于仞漢武時于壁上鑿孔橫攢巨木作基因而重叠架樓三座鉅麗巍峩上接于天下不着地所謂空中樓閣復在巖唇半爲所覆雨日不及歷代及明嘉靖間重修真天下大巧而奇觀也架棧曲屈爲道而上番騎至則去棧故不經兵火兼明書云蘋爲萍類根不植泥生于水上今人呼爲浮菜



山堂肆考。鎮江金山在大江中。每大風起。勢若浮。初名浮玉。唐裴頭陀于此開山。得金表。聞賜名金山。桂林府東北有伏波山。突起如柱。去地一線不合。俗傳馬伏波試劍名。纂要云。張功甫是張循王孫。園池聲伎服玩甲天下。常于南湖園作駕霄臺。于四古松間。以巨鐵絙懸之空。當風月清夜。與客梯登之。飄搖雲表。南漢志云。林楚材故番禺布衣也。大寶末。有稻田自海中浮來。上魚藻門外。民聚觀之。楚材見而嘆曰。水魚湫湫兮。南唐好事。或有記其語及宋。

師至潘美爲都鄣晉方悟爲潘字也

## 化石

化書言有情之物能化無情夫至于石則無情之極矣顧徵于古則化石者甚多品類焉 儋州昌化縣峻靈山本名朝明山上有二石如人相傳有兄弟向海捕魚化爲石號兄弟石又有石若冠帽乃二兄弟所遺及石池石船皆其所乘遊者 涇水所經有貞女峽峽西岸高巖名貞女山山際有石如人形高七尺狀如女子故名貞女峽古來相傳有數女取螺于此遇風雨晝晦忽化爲石 方輿勝覽云三石在廣

西永安州城南十里僞漢時有兵入靖江過此黎明  
遇獵者牽黃犬逐一鹿兵以鎗刺鹿徐視之石也已  
而人犬與鹿皆化爲石鼎峙道旁今一石尚有瘡痕  
南甸宣撫使丙弄山有石和尚相傳昔大理一僧  
來南甸坐化于此久乃變石 地圖記有夫婦二人  
將兒入山獵其父落崖妻子將下救之並變爲三石  
錄異記乾符中天台有僧與同侶從臨海縣得洞  
穴行數十里其俗素習嚙氣同行者飢甚詣市肆乞  
食人曰若能忍飢速還無苦若啖此地食必難出矣

食畢其啖食者立化爲石 二酉委譚云甘州一山洞中有一立化神女名某母其旁有屠者蹲踞而化云初屠者見一女子買猪肝一二片疑之乃微踪其往至一山洞中屠者就見焉女爲說法因各化石皆真身也第神女身上無所繫下去地將一尺竟不知何以中懸助甫每往視輒令人手捫之竟不着地云宋史紹熙元年崑山縣工採石而山壓三年六月他工採石隣山聞其聲呼相應答如平生其家鑿石出之見其妻喜日久閉乍風肌膚如裂俄頃聲微噤

不語化爲石人貌如生 又金罍子云有道者化白

石羊題勝曰修羊公 十六國春秋云晉末雁門郡

吏賈相入句注西陁見一老人言四十年後聖人出

于北方時當大樂老人隨化爲石 東陽志云與三

衢相近日容車山上有石周三百步高三百丈有賣

薪者每五鼓適市過之如聞笙唄聲後十年山俱破

岡湧起 石僧跏趺而坐衆大驚異因建石僧院以

祠之 慎蒙名山記云石婦山在廣德州衆山環繞

中一峯獨高 石高二丈許如婦人狀舊傳謝氏女

介潔有守登山化爲石藤蘿薜荔繞其上如衣被之  
狀獨露其而樵者不敢採

豫章記云仙人王子喬駕白象遊于高安之荷山其  
象化爲石 山川記異云河南府有象莊漢時西域

僧以象馱經至洛陽化爲石 湧幢小品云昔有神

人驅石之海祝曰蒼蒼爲牛鑿鑿爲羊羊牛來斯曰  
驟而驟石皆羣奔鞭之流血旣出谷見老姥問曰見  
吾羊否姥曰奔石也羊吾不知又問見吾牛否曰奔  
石也牛吾不知神人曰惜爲汝道破因忽不見惟石

石存焉 普寧州西十里牛戀村相傳有異人牧羊  
瀛海邊牛夜入水戀草忽鷄報曉牛盡化爲石水中  
石像若牛形 名勝志云雷州遂甌縣英靈下村有  
石牛南朝時客陳姓者驅牛過此土地堂前牛悉化  
爲石石皆半爲牛頭客因家于此卽雷種之祖地  
廣州城爲五羊城裴淵記戰國高固相楚時有五仙  
人乘五羊各持穀穗一莖六出衣與羊色各如五方  
遺穗與州人勝空而去羊化爲石至今猶存 神仙  
傳黃初平年 五家使牧羊有道士見其良謹將至



金華山居石室中四十餘年兄初起行索初平遇道人引至山與弟語問羊何在平與兄往至山東見白石因叱之石起成羊數萬頭其石至今存金華山中名勝志云石馬井在徐聞縣東五里相傳昔有馬常夜食人禾爲人追急入此井只留石形似馬故名今有碑刻石馬之人四字 岳池縣老君山舊碑載唐天祐間有道士乘馬至此馬化爲石道士亦不見漢志越巂郡遂久縣有石猪圻長谷中有石猪子母數千頭長老傳言葬昔牧猪于此一朝化爲石迄

今葬人不敢往牧

太康地志云秦文公時陳倉人獵得獸若兔不知名  
牽以獻之逢二童子童子曰此名爲蜩常在地中食  
人腦卽欲殺之相捶其首蜩亦語曰二童子名陳寶  
得雄者王得雌者霸陳倉人乃逐二童子化爲雌雄  
且使余北阪爲石秦祠之雄者飛至南陽後光武起  
于南陽

三秦記云太白山南有陳倉山山有石鷄與山鷄不  
別趙高燒山石鷄飛去而石鷄不去晨鳴山頭聲聞

三十里 又有鴨山昔人見雙鴨飛入池化爲石唐  
乾元建鴨山寺

雲林石譜云通遠軍卽古渭州水中有龜類魚鴈或  
作覓覓之聲土人見者以鋌刃或堅物擊之多化爲  
石或長尺餘價值數十千凡兵甲刃經此石磨治者  
青光而不斂 祁門縣西赤嶺其嶺下有溪溪中魚  
能飛相傳古有爲梁于溪以取魚魚不得下夜飛越  
嶺漁人乃張網山上待之魚飛不過皆化爲石遇雨  
則赤 廣輿記鯉石在巴山世傳琴高先生于此得

道所乘之鯉化而爲石 崖州臨川水源出黎山其  
水產石鱗只是常鱗以年久被水沫相浥因成石每  
遇海潮卽飄出石鱗味鹹寒有毒主消眼翳 海槎  
餘錄云石鱗生于崖州之榆林港港內半里許土極  
細膩最寒但鱗入則不能運動片時成石置之几案  
能明目

興化名勝志云神僧智廣禪居仙遊九座山太平院  
有巨蟒廣至其所蟒口如屋廣杜錫坐其中蟒化爲  
石今院東三百步有石龕廣逾尋丈曰樓真 名

鱗口巖者是也

名勝志云澠池縣北有雲門山其寺曰雲門寺西北有王喬洞山石皆土所成取而破之木葉之形交錯其間文理具在若雕刻然洞之上二木亦皆化石而產枝葉猶故其舊碑云昔神仙大丹成土木皆化爲石 輿地紀勝云宋建炎間遂寧府轉運使衙內後園有松石外猶松樹而中化爲石 重慶府永川縣有石松坪在來蘇鎮有松化石石質而松理或二二三尺許大可合抱然不過相望數山有之俗呼雷燒松


續神仙傳馬湘字自然唐建中元年至永康延真  
觀前指松樹曰此松已三千年矣當化爲石至夕大  
風雨其松果化近觀松皆化爲石盤根大柯文理曲  
折皆在 唐書僕骨東北千里有康干河投松入水  
三年化爲石其色青有松紋名康干石 墨客揮犀  
云莆田壺公山有栢木長數尺半化爲石半猶是堅  
木蔡君謨運至私第 夢溪筆談云延平永寧間大  
河岸崩入地數十尺土中得竹筍一林凡百莖根幹  
相連悉化爲石 花史云南康五山上有石桃故老

云。古有桃樹生于嶺巔。隱淪之士將大取其寔。因變成石。

宋宣和中。東陽資福院燬于火。獨藏經皆變爲石。卷軸宛然。叩之有聲。

傅大士名翕。字元風。于義烏雙林寺行道。山多猛獸。大士每齋竟。輒持餘飯飼之。自是伏匿。今名餞虎岩。餘飯化爲石。可琢數珠。是時有陶氏子。資給大士甚勤。因付囑之曰。此石他日贈汝子孫。今惟此一家能琢。他人效之。石乃穿裂。

述異記陽泉在天餘山北。清流數十步。所涵草木皆  
化爲石。精明堅勁。其水所經之處。物皆潰而爲石。  
張侍郎追虎鞭之。虎死化爲石。昔有星墮水化爲  
石。當彭蠡澤中。俗呼落星潭。





有志之士能瘳奇疾

人有奇病抱之終身而不可脫必能忍痛施療而後轉危爲安更立功名垂于竹帛也三國志註云長山

卽金華人留贊字正明少爲郡吏與黃巾戰一足被刳

遂屈不伸久之謂其親屬曰英雄並起而我屈篋在閭巷間與死何異今欲刳引吾足死則已矣幸不死而足伸庶幾可見用親屬難之贊乃引刀刳其筋血流滂沱氣絕良久家人怖甚曰業已爾其伸足遂伸及創愈凌統奇之表薦爲屯騎校尉隨諸葛恪征東

大敗魏師 晉書云魏詠之家貧嗜學生而免缺聞

荊州刺史殷仲堪帳下有各醫謂家人曰發醜如此

用活何爲遂資數斛米投仲堪造門自通仲堪爲召

醫醫曰可割而補但須百日進粥不得笑語詠之曰

半生不語而有半生亦當療之况百日耶遂處別室

食薄粥閉口不語盡如醫言缺竟補始爲仲堪客後

竟踐其位斯二人蓋所謂有志之士卒以愈疾而顯

其功名又名賢錄云浙新昌人吳希汴性柔順事父

宗信務得其歡心洪武初民斷指者法戍邊宗信以

疾矢將指之半里正將捕之希汴憂形于色會有善  
接者人弗之信希汴獨心喜乃截右足小指接父將  
指彼此血出淋漓月餘瘡果愈指果續已而瘡復潰  
指斷如故希汴籲天誠禱復截左足小指接如前法  
血交氣貫一指宛然如生此則至孝之極通于神明  
非特立志之謂也 宋僧癡海龍泉人崇因寺僧也  
性多騃故名癡海耳無垂珠唇不蓋齒其師語之曰  
汝貌陋福薄宜自勉癡海感其言日至東廊觀音堂  
焚香百拜每一拜以手襯落其唇并耳三年不息不

覺上唇下垂而兩耳及肩癡海拜不已一日睡于蒲  
團夢所拜觀音垂手摩其頂曰賜汝聰明福相寤覺  
心境廓然如脫重病遂通諸部經典後著金山水陸  
儀文盛行于世永嘉江水寺碑其手筆也 纂要云  
魏賈逵爭公事發憤生瘰欲割之太祖惜之曰千人  
割千人死逵猶割之竟愈

投崖不死

置之死地而後生此在兵法爲制勝之計耳君子守正則不立巖牆之下若夫高岸懸崖投身其下自必死人亦信其竟死而全身無損此誠孝所感其中有天焉非可常情量測也 通志云楊氏女名細秀金谿人父宣邁危疾幾殆女年十四籲天求以身代或傳軍山懸崖千仞凡有疾捨身崖下則愈女偕祖祖既登岸躍然投之祖意其死拔援下至溪谷聞有聲曰我在此視之肢體如故惟額少傷歸而父愈王

金事稽贈之詩有至今親老在高堂萬古鄉人傳孝  
烈之句 名賢錄云視崑麗水祝大昌之子也大昌

隱居養親以孝稱母沒柩在堂家人失火力不能採  
伏棺而號其火自滅復塑二親像于堂朝夕事之如  
事生崑之事大昌一如大昌之事母洪武初盜賊未  
靖崑奉母避亂山中母被賊逼投崖下崑大驚叫擲  
身赴救忽雷雨大震賊衆驚潰一時避難者俱得脫  
母悶絕崖下崑掛樹枝得不死卒救母全活洪武七  
年舉孝廉擢潛山縣知縣未幾卽陳情養母 祝枝

山野記云景泰初祥符民袁海從募戍邊母病于家婦徐氏割股餌之卽愈後復病婦禱于空祈立帝祐願進香武當以謝卽夢神與母藥一粒吞之旣寤復愈夫還語之故夫與母妻偕往至南巖宮徐始言向姑危時妾寔請捐軀代姑今當如約姑與夫愕然方止之宛轉已不見徐乃潛至飛昇臺旁投身萬仞之崖留鞋崖畔覓者見鞋大慟而已俄而姑與夫持香上金殿遙見一人在殿下拜禮卽徐也駭問之徐言力捐軀而下忽若衆擁持之不覺已在此也遂同歸

李濂云予至王屋山訪李道人菴道人山西高平人以母病登天壇舍身崖舍身以祈其愈予諾之答云初墮時但如行清化鎮上

鎮在河內縣去山百五十里

忽有龜

蛇左右相逼始知墮崖則已坐深谷中肢體無損凡四晝夜罔知飢渴天壇老道士聞其捨身覓而得之時隆寒俾之附火右足悉墮其指自是母病亦愈遂結菴山中 閩書吳景文妻鄭氏洪武元年木溪寨寇至舉邑驚走鄭及女伴十餘人避難山谷棄其週歲兒墜上草中寇進迫之自高崖投下衣絰于棘良



久復墜不死而右足折一女同投者衣無所縫縶粉  
矣寇退瑾亦無恙人謂天相而邑人稱同投者曰投  
崖女子乃建寧府政和縣人也 又松溪縣李述之  
母黃妙銖至正丙申青川寇侵縣妙銖方盛年與羣  
婦逃出郭門被執據地哭拏不行驅迫之投高崖下  
寇舍去至暮述父跡得之而猶生也 徐仲光孝童  
記云童子姓孔曲阜至聖裔年十歲母病醫謂不可  
起童子日夜涕泣私祝泰山神願隕身以續母壽既  
而病愈童子告家人曰嘗許禮泰山必身往酹母許

之山之絕頂舊有捨身巖高不可測童子呼從者導  
往臨崖頓顙奮身自擲而下從者無由持救且絕無  
垠逕可尋覓是日泰安州守將有所適過山麓見空  
中片雲結集若有人影蹶之搖颺上下守以爲仙也  
歎駭望拜已而雲益近閃忽之際欻然墜地乃一童  
子詢之自言氏籍及捨身報母之意不知何自有雲  
扶擁至是守贊羨爲給貲遣吏送歸時癸巳初夏也  
按墨莊漫錄云劉安世器之在都下僧化成見之曰  
公在胞胎中有不測驚危幼年復有惡疾幾爲廢人

然卒無恙蓋器之父航赴官蜀中時母方娒遇棧道  
天雨新霽磴滑危甚忽石墮馬蹶夫人已墮崖下矣  
衆皆驚泣無復生望試使下瞰崖腹有巨木葛藟縈  
結蟠屈如蓋落葉委藉夫人安坐于上呼之卽應乃  
以衾幪懸縋而上了無所傷至官未幾而有器之後  
十餘歲居京師苦赤目甚惡晴溢于外百醫莫差一  
日有客云其一相識來調官畜惡目藥甚效昨已  
辭早晚卽行試遣人往求之時行李已出房云藥誠  
有之忘記在某篋中初發一篋藥乃在焉以藥傅晴

上軟綿纏護戒七日方開一傳痛卽止及開牖已收  
入內眸子瞭矣又耳談載一女子隨父宦蜀墜棧道  
中無可爲計三年宦歸投一近崖之寺將追薦亡者  
見佛案前一花非世所有僧云一仙女飛空至常以  
是花供佛于是候之至來則卽前女也亦因藤蘿藉  
護而不死食藤花實久乃能飛與之歸復無異恒人  
焉此則無心而墮乃亦有緣而生俱非意計所及

原化記京兆韋氏名家女適武昌孟氏唐大曆中孟  
與妻弟韋生同遷韋生授尉于縣尉孟授閬中錄事

參軍分路之官韋氏從夫入蜀路不通車輿韋氏乘馬從夫至駱谷口忽然馬驚墜于巖下數百丈視之杳黑一家慟哭無如之何遂設祭服喪拾去韋氏墜下約數丈在枯葉之上體無所損悶絕而甦經一日飢甚取木葉裹雪而食傍視有一巖罅不知深淺仰視處如大井焉分當死矣忽于巖谷中見光一點如燈後更漸大乃有二焉漸近是龍目也韋懼甚負壁而立此龍漸出可長五六丈至穴邊騰孔而出頃又見雙眼復是一龍欲出韋氏自度必死寧爲龍所害

候龍將出遂抱龍跨之龍亦不顧直躍穴外遂騰于空韋氏不敢下顧任其所之如半日許意疑已過萬里試開眼視此龍漸低又見江海及草木其地度四五丈恐負入江遂放身自墜落于溪草之上良久乃甦韋氏不食經三四日氣力漸憊徐徐而行遇一漁翁問此何所漁翁曰此楊子縣韋氏私喜曰去縣幾里曰約二十里韋氏具述其由兼飢渴漁翁取府中茶粥飲食之韋氏問曰少府到任未翁曰不知韋曰某卽少府之姊也倘爲載去至縣當厚相報漁翁

與載至縣門韋少府已上任數日矣韋至門遣報孟  
家十三姊欲入韋生不信曰姊隨孟郎入蜀那忽來  
此韋氏令具說此由韋生雖驚亦未深信出見之其  
姊號哭語其遭厄顏色痿痺殆不可言舍之將息尋  
亦平復韋生終有所疑後數日蜀中凶問果至韋生  
意乃豁然追酬漁父一十千遣人送姊入蜀

泉石草木公而不私

孔子云曾謂泰山不如林放予考泉石草木多有止  
給公用而不應私請者豈真各有神司之而造化土  
張之與 長興顧渚山產異茶採取充貢名勝志云  
其山有泉在沙中號金沙泉泉不常出惟將造茶太  
守具儀致祭頃卽清溢供御者畢泉卽微減供堂者  
畢泉卽半減太守造畢卽涸或還施愆期則有風雷  
毒蛇之變故事湖州進紫筍茶以清明日至先薦宗  
廟後分賜近臣按元史唐時用此水造茶宋末屢浚



沼泉不出是時帝遣官致祭一夕水溢可溉田千畝  
所司以聞賜名瑞應泉 靈壁縣磬石山其石專給

公家之用民間私採者則無復聲 搜神記漢武徙

南嶽之祭于廬江潛縣霍山之上無水廟有四鑊可

受四十斛至祭時水輒自滿用之足了事事畢卽空

塵土樹葉莫之汙也積五十歲歲作四祭後但作三

祭一鑊自敗 于寶晉記云空桑之地今名爲孔竇

在魯南山之空竇中有雙石如桓楹起立高數丈魯

人絃歌祭祀穴中無水每當祭時洒掃以告輒有清

泉自石間出足以周給事既已泉亦止 史記註霍  
太山有岳廟甚靈鳥雀不棲其林猛虎常守其庭鼓  
動則泉流聲絕則水竭 水經注湘東陰山縣有侯  
曇山上有靈潭潭前有石井深數尺居常無水及臨  
祈禱則甘泉湧出周用則已 文獻通考宋顯靈廟  
在安陵東北先是陵域附山而高常苦乏水景德中  
朝陵車駕至則泉源湧涌濟用無缺詔封泉神爲昭  
應公廟曰昭聖並在河南永安縣界 泰山玉女池  
在太平頂池側有石像泉源數壅而濁宋東封時先

營頓置泉忽沸涌上從升山其流自廣清泚可鑑味  
甚甘美經度制置使王欽若請浚治之像頓繼折詔  
易以玉石

物有本小而特大者

史異云長人國人類長三丈鋸牙鈎爪黑尾覆身不  
火食噬禽獸或搏人以食得婦以治衣服其國連山  
數十里有峽錮以鐵闔號關門新羅常屯弩士數千  
守之 北史高昂傳盧曹率其徒自薊入海島得長  
人骨以燭髀爲馬皂脰長丈六尺以爲二稍送其一  
於神武諸將莫能用惟彭樂強舉之

郭頌世語云晉文王之世大魚見孟津長數百步高  
五丈頭在南岸尾在中流 藝堅志云趙鼎貶珠崖

帥張淵道遣使致饋自雷州浮海風力甚勁顧見波濤中紅旗相逐而下使者疑爲海寇舟人搖手令勿語急入舟披髮持刃出蓬背立割其股血滴水中凡經二時乃相呼曰更生因言此巨鱷也紅旗者鱷鬚耳使與吾舟相及一展轉舟則淪溺是時舟南去鱷北上相望兩時彼此各行數百里計其身當千里有餘宋紹興十八年漳浦崇照鹽場海岸邊有巨魚其一高數丈割其肉數車不動及剗其目乃轉嘴震鬣旁船皆覆又其一漁人所獲長二丈餘重數千斤

剖之有人橫腹中膚髮如生 名勝志云南海多鯨  
鯢大者數千里小者千里漁人往往見之代林邑時  
于海嶼得鯨頭骨如數百斛圖頂頭上下孔大如甕  
俗以爲珠穴 海槎餘錄云海槎秋晚巡行昌化屬  
邑俄海洋烟水騰沸競往觀之有二大魚遊戲水面  
各頭下尾上夾起烟波中約長數丈餘離而復合者  
數回每一跳躍聲振里許余怪而詢于土人曰此番  
車魚也間歲一至此亦交感生育之意耳又海鱗乃  
水族之極大而變異不測者梧川山界有海灣上下

五百里橫截海面且極其深當二月之交海鮪來此  
生育隱隱輕雲覆其上人咸知其有在也俟風日晴  
暖則有小海鮪浮水面眼未啓身赤色隨波蕩漾而  
來土人用牀載藤絲綵如臂大者每三人守一  
莖其杪分贅逆鬚鎗頭二三支于其上遡流而往遇  
則並舉鎗中其身縱綵任其去向稍定時復以前法  
施射一二次畢卽棹船並岸創置沙灘徐徐收索此  
物初生眼合無所見且忍疼疼輕漾隨波而至漸登  
淺處潮落聞置沙灘不能動一材分鬻其肉作煎油

用亦大矣哉 紀畧云正統十六年餘姚縣有魚涸  
于海際長千餘丈民采其肉餘萬斤越三日潮大至  
復去旣而蝗食稻殆盡 後漢書靈帝熹平二年東  
萊海出大魚一枚長八九尺高三丈京房易傳曰海  
出巨魚邪人進賢人疏

拾遺記云大蝦長一尺鬚可爲簪 洞冥記漢有丹  
蝦長十丈鬚長八尺有兩翅其鼻如鍬 又按毛詩  
義疏蝦大者有一尺六七寸今九真交趾以爲杯盤  
實奇物也 兼明書云廣州獻蝦頭杯簡文將盛酒



無故自躍故不復用 嶺表錄異云劉恂者曾登海  
舶入舵樓忽見窓板懸二巨蝦殼頭尾鉗足俱全各  
七八尺首占其一分嘴尖利如鋒刃嘴上有鬚如紅  
筋各長二三尺雙脚有鉗鉗粗如人大指長二尺餘  
上有芒刺如薔薇枝赤而鋸硬手不可觸腦殼烘透  
奪環尺餘何止于孟孟也 王隱交廣記三國吳後  
復置廣州以南陽滕修爲刺史或語修蝦鬚長一丈  
不信其人復至東海取蝦鬚長四丈四尺封以示修  
修乃服

又有巨龜其大不知幾千里皆有商者見海中育洲  
島上生樹木因依以採薪及作食不知爲龜久在沙  
嶼泥土積其背而樹木生焉龜忽入海死者數人

洞冥記善苑國貢一蟹長九百尺足四螯因名百足  
蟹 汲冢周書海陽巨蟹其殼專車 山海經云姑

射國大蟹在海中郭璞註蓋千里之蟹也又云女丑  
有大蟹郭註廣千里也 元中記云天下之大物有  
北海蟹焉舉一螯加于山身故在海中 農田餘話

云高郵湖大蚌珠宋汴京時諸公記之蚌大如席珠

大如拳

交州記云徐聞縣多大蜈蚣其皮可冒鼓取其肉暴  
爲脯美于牛肉又云大者長數丈能噉牛葛洪遐觀  
賦云蜈蚣大者長百步頭如車廂可畏惡越人臘之  
肉如瓠 天寶四載廣州因海潮漂一蜈蚣死剖其  
一爪得肉一百三十斤

嶺南異物志云常有人遊南海泊于孤岸有物如蒲  
帆飛過海將到舟舟人盡以物擊之如帆者盡破碎  
墮地視之乃蜺蝶也海人去其翅足秤之得八十斤

噉之極肥美 堯山堂外紀云元王和卿滑稽桃達  
傳播四方中統初燕市有一蝴蝶其大異常王賦醉  
中天小令云桴破莊周夢兩翅駕東風三百處名園  
一採一個空難道風流種說殺尋芳蜜蜂輕輕的飛  
動賣花人扇過小橋東由是其名益著

杜陽雜篇云貞元八年吳明國貢有鸞蜂蜜云其蜂  
之聲有如鸞鳳而身披五彩大者可重十餘斤爲窠  
于深巖峻嶺間大者占地二三畝國人採其蜜不過  
二三合過度則有風雷之異若誤螫人則生瘡以石

上菖蒲根傳之卽愈其蜜色碧常貯之于白玉枕表裏瑩徹如琉璃久食之令人長壽顏如童子髮白者應時而黑及沉疴跛眇諸僻惡之病無不療焉 楚詞云玄蜂若壺 抱朴子崑崙大蜂一丈其毒殺象續博物志云馬緒謫潮得巨蟻長尺餘鹽漬之歸誇北人 楚詞赤蟻若象 東山記曰蟻有重四十斤者 黃帝時大螻如羊大蟻如虹

七修類藁云滁有魏生乘馬山行漸入于夜隱隱見前途一物如金鏡奕奕有光殆近馬首由山然未去

也悉以爲祟舉鞭擊之墮地視之一大螢耳

拾遺記員嶠有冰蠶長七寸黑色有角有鱗以霜雪覆之然後作繭長一尺其色五采織爲文錦入水不濡投火不燎 說畧云園客與妻收蠶繭大如甕纒一繭六十日始盡

酉陽雜俎云裴旻山行有山蜘蛛垂絲如匹布將及旻引弓射殺之大如車輪因斷其絲數尺收之部下有金瘡者剪方寸貼之血立止 海語云海蜘蛛巨若丈二車輪文具五色非大山溪谷不伏也遊絲溢

中牢若絙纜晨輝照耀光燄奕奕虎豹麀鹿間觸其  
網蜘蛛益吐絲如綃霞纒糾卒不可脫俟其腐斃乃  
就食之舶人欲樵蕪者率百十其徒束炬而往遇絲  
輒燃紅遍山谷如設庭燎蜘蛛潛藏邃密惟恐其及  
金文靖公北征錄中記元故都處有蚊如蜻蜓

述異記云西域有鼠國大者如猪中者如兔小者如  
常鼠頭悉白商賈經其國者若不祈祀則嚙人衣裳  
物理小識云凡鼠食仁人目睛則爲王劉敬叔亦  
云釋道安常親至鼠王國鼠大如狗鼠母長三尺馬

蹄牛尾如猴有乳

神異經云北方層冰萬里厚自

丈有磈鼠在冰下土中其形如鼠食草木肉重十斤  
可以作脯食之已熟其毛八尺可以爲褥臥之却寒  
其皮可以蒙鼓聲聞千里其毛可以來鼠此尾所在  
鼠聚 湖海搜奇云衍聖公庾廩中有巨鼠爲暴狸  
奴被陷者不可勝數一日西商携一猫至其形如常  
索價五十金曰保爲公殺此公不信商固要文契而  
縱之曰克則受金乃聽其所爲猫入廩穴米自覆而  
露其喙鼠行過其上嗅之猫躍起嚙其喉鼠哀鳴躑



跳上下梁者數十度而猶持之愈力遂斷其喉猶亦力盡明旦驗視已雙斃其鼠重三十斤 陶弘景註

鼯鼠曰諸山林中有獸大如水牛形似豬灰赤色下脚似象胸前尾上皆白有力而鈍亦名隱鼠人取食之肉亦似牛多以作脯乃云是鼠王其精濁一滴落地輒成一鼠災年則多出也 頌曰鼯鼠出滄州及

胡中似牛而鼠首黑足大者千斤多伏于水 按異

物志云鼠母頭脚似鼠口銳蒼色大如水牛而畏狗

見主水災

晉書云宣城郡出隱鼠大如牛形似

金鑑十云晉寧縣境出大鼠狀如牛土人謂之鼠

牛時出山遊毛落田間悉成小鼠苗稼盡耗

梁書

云倭國有山鼠如牛又有大蛇能吞之

以上本草

海語

云海鼠大如豕重亦百斤目正赤

藝海淵酌云郭

璞既過江宣城太守殷祐引爲參軍時有物大如水

牛灰色低脚脚類象胷尾皆白使人取之令郭作卦

遇遯之蠱其卦曰艮體連乾其物壯巨山潛之畜匪

兇匪虎身與鬼并精見二午法當爲禽兩翼不許遂

被一創還其本土按而名之是爲鼯鼠卜甫畢殷衛

士以戟刺之深尺餘遂去不復見祐在宣城有九尺  
尾鶚集廳事前茲又見驢鼠何此君之多逢怪也

郭璞曰合蜀山卽岷山中有大牛重千斤曰夔牛

漢書尉廩國出大狗郭義恭廣志云尉廩大狗大如  
驢赤色數里搖尾以呼之

東漢之羊尾重七斤

康居之雞尾長五尺後漢書馬韓有長尾雞尾長五  
尺

安息國有大馬爵廣志云頭及膺身似橐駝色蒼舉

頭高大九尺張翅丈餘食大麥

舒梓溪云承運庫有大鵬圖管其籍曰鵬翎可容粟五斗餘

墨莊漫錄云王黼搜求四方環奇之物以充玩好有奴以桃核半枚來獻容米三四斗其間題咏字滿矣李端叔云觀此桃則退之所謂華山十丈蓮不亦信乎常觀洽聞記云吐谷渾桃如大石甕豈非此桃

舒梓溪云內承運庫有蟠桃半核可容粟五斗大司馬林泉山作五石瓠文言弘治間常目擊之南康

建昌縣有大果寺寺有梨樹結子大如斗故以爲名  
洛陽伽藍記魏高祖孝文立報德寺其里內有園  
珍果出焉有合消梨重十斤從樹著地盡化爲水

錄異記云陝州山中有梨一株甚偉貞觀初有鳳止  
此梨其後結實大如合掌狀團圓宛轉有赤黃異色  
馨香脆美爲諸果之王世名鳳接梨 白馬寺有大  
桑林實重七斤 馬韓出大栗如梨 寰中記云天  
下之高者扶桑無枝葉上至于天下通三泉 卜洲  
記云扶桑在碧海中上有天帝宮東王公所治樹長

數千丈兩兩同根更相依倚仙人食其根體作金色  
山海經東北海外圓丘之南有三桑木長百仞無  
枝淮南子云扶桑在陽州日所拂漢書地理書  
志註敦煌卽左傳所云允姓之戎居于瓜州者也其  
地今猶出大瓜長者狐入瓜中食之首尾不出

廣東名勝志云羅陽溪在雙髻峯下羅浮諸峯之水  
西滙于此溪旁產籠窓竹一名龍公竹徑七尺圓節  
長一丈二尺唐永泰中有竹葉流出大如芭蕉隨水  
流出韻府云頓丘帝竹一節可爲船盛弘之荆

州記云臨賀山中有二竹大數十圍有盤石徑四五丈清滑如棋局二竹屈垂拂掃石上絕無塵穢未至數十里風吹竹音如笙簫臨水出焉流合賀水 永昌府志勝云永昌有大竹名濮竹節相去一丈受一斛許 神異經云南方荒竹有箝竹長數百丈厚八九寸可以爲舩其箝甚美煮食之可止瘡癘 嶺表錄異云有鹽戶犯禁逃于羅浮山溪入第十二嶺遇巨木萬千連直巖谷竹園皆二丈餘有三十九節節二丈許逃者遂斲竹一竿破以爲筏會赦宥遂挈以

歸有人得一篋奇之獻于太守李復乃圖而紀之  
隴川宣撫司蹲鴟有大者長一尺二三寸 水東日  
記云嶺南南海祠前波羅蜜樹其實大者至數十斤  
癸未所收尤大者至三十斤重皮青黃色多角頗類  
刺蝟子味似茨菰肉甚厚以皮漬之可調湯 補貝  
經云文王得大秦貝徑半尋穆王得其殼憑手觀秦  
穆公以遺燕噐可以明目遠察宜玉宜金



物有本大而成小者

名勝志云有交趾道士年近百歲渡海船壞結庵于  
廣東海陽縣之金山養一鷄大如倒挂子置枕中啼  
卽睡覺又一胡孫小如蝦蟇以線繫几案間道士飯  
已卽登几食其餘又有龜狀如錢置金盆中時出戲  
衣褶間 海鏡一名海月廣人呼爲膏葉兩片合以  
成形殼甚瑩滑如雲母光內有小肉如蚌蛤腹中有  
蟹子甚小頭黃螯足俱備蟹出拾食蟹飽滿腹海鏡  
亦飽或迫以火蟹子卽走出離腹腸立斃或生剖之

蟬子活在腹中逡巡亦斃 瓊山縣有蛤之屬曰刷  
其腹有小蟹如榆莢剝開甲食則蟹亦出食剝甲合  
蟹亦還 暖姝由筆云曹方湖爲南豐知縣時其地  
出小猿如小兒拳大人藏袖中爲戲土人名栗子猿  
崇安志云武夷山多獼猴其小者僅如拳 庸與

齋言粵東見石猿如拳 張世南云龜老則神無至  
八百反小如錢夏則遊于香荷冬則藏于藕節其息  
有黑氣如煤烟在荷心狀甚分明人見此氣勿輒驚  
動但潛含油管喫之卽不能遁形 滇中錄谷粟長

官司產小鷄鷄形矮小鳴經晝夜與中國鷄聲異  
北戶錄云鷄毛腿出恩州鹽藏之其味絕美其細如  
針郭義恭云小魚一斤千頭未之過也 北史高句  
麗出三尺馬所謂果下馬也 宋紹興初朱勝非出  
守江州過梁山有龍入其舟纔長數寸赤背綠腹白  
尾黑甲有光 史異云唐武德五年高昌國獻狗高  
六寸長尺能曳馬銜燭云生拂菻名拂菻狗  
黃越通云漢中洋縣出九兩鷄山各間百十爲羣重  
者皆止于九兩

紀畧云嘉靖三十四年衢州商人胡秀號碧泉于餘  
杭新街頭楊一松家寓下携一小人至長可一尺眉  
目鬚髮種種皆備乃男子也約年五十餘歲云至海  
東大洋中泊洋時忽風浪中得此同輩男女一十七  
人衆商救之各分其一乃以朱紅烏籠盛之承以木  
板以米水食之但聞作啾啾聲不知所言何事見人  
亦不驚懼能周旋其間倦則睡息此卽瑱人國人也  
柳子厚詩瑱人長九寸 西陽雜俎云李章武有人  
腊三寸餘頭髻助成就眉目分明言是僬僇國人

博物志云西北荒有小人焉長一寸其君朱衣玄冠  
乘輅車馬引爲威儀居處人遇其乘車並食之其味  
辛終年不爲蟲所咋并識萬物名字又殺腹中三蟲  
楊升庵云千人捏似蟹大如錢殼甚堅壯夫極力  
捏之不死 墨莊漫錄云襄邑義塘村出一種瓜大  
僅如拳破之黛色味甘如蜜頃歲入貢或以其子時  
他處輒變而稍大味亦頓減

襄邑今  
堆州

姚令寬西溪

叢話云許昌節度使小廳是魏景福殿基殿前有小  
李子色黃大如櫻桃俗謂之御李子卽獻帝遷許時

所植 宋許觀東齋記事云辰州有一種小竹曰龍  
孫竹生山谷間高不盈尺細僅如針凡所以爲竹無  
不具前輩詩有小竹如針能具體卽此也

王麟洲二酉委譚云往聞邊城有小棺數十具啓之  
皆紗帽紅袍以爲異近同僚徐方伯云修甘州城初  
破土見有一小棺出之已而愈斲愈多棺皆長二三  
尺啓視鬚髯儼然老人也衣服不同大抵多紗帽紅  
袍者亡慮數十衆喧然遂止不復發爲祭文掩而葬  
之竟不知是何物何緣得葬土城之內張大叅亦云

涼州亦同時有之但不如是之多耳或云是妖狐所  
化然妖能靈異于生時豈死而不復其本質則益不  
可解 王行甫云南兗某村掘地得古隧曰姚氏之  
門爲棺幾萬幾千幾百皆瓦棺長尺許棺內男女枯  
骸實符其數不知何物仍覆瘞之 予家繼山憲副  
在松潘浚賊墮得人口數千百皆長一尺許衣冠自  
三代以下皆具

南墅閒居錄云丁謂有小山高纔數寸蒼翠嵌空盛  
夏常設盆水置小山其中一日張晏有客桐水洒之

須臾雲霧自竅中出有光如電。細視之。蜿蜒小龍如線。掛雲霧中。已而散。釋蜿蜒亦莫知所之。衆客驚異。謂曰。此龍精石也。龍交海上。流精于石。



雷之生物

雷爲天之號令其威赫然而其意實主于生物也故

曰帝出乎震 埤雅云孔雀聞雷而孕 十一月雷

在地中雉先知而鳴說文雉雌雉鳴也 雷始動雉

鳴而雉其頭蓋鳴鶴以足相勾雉以頭相勾故鳴鶴

從句雉亦從句 南越志云象聞雷聲則牙花爆出

遂巡復沒釋氏書言象牙生理必因雷聲 法苑珠

林有七事受胎其六則聞聲受胎如白鷺鳥悉雌無

雄春陽時節雷鳴初發一心聞聲即便懷胎 涅槃

經芭蕉故無心何以聞雷而長 集靈記云有僧在

蒙山頂見一老父云蒙山有五頂仙家所謂雷鳴茶

者候雷發聲并手于中頂採擷一兩祛宿疾二兩當

眼前無病三兩換骨四兩爲地仙矣蠻甌志云覺林

院僧志崇收茶三等待客以驚雷莢自奉以萱草帶

供佛以紫茸香蓋驚雷莢其中平者也 張七澤云

桃有名雷震紅者每雷雨過輒見一紅暈最爲難得

日詢手鏡云廣西橫州有雷茵味鮮美雷過則生

須疾採稍遲非腐則老故呼爲雷茵蘓嘉德 王

鴻漸云菜譜言雷聲苗春夏雷雨後生茂草中  
菇味亦相似 酉陽錄引相感志今浙東生土芋狀  
磊塊自實若天雷頻則多生 椒園雜記云香蕓雜

溪山至陰處有之其法用乾心木橄欖木名曰單櫟  
就溪山下砍倒仆地用斧斑駁剝木皮上候淹濕經  
二年始間出至第三年乃徧出每經立春後地氣發  
洩雷雨震動則交出木上 閩書建安縣武彝山御

茶園種茶進御者也園中有臺名喊山臺上有亭亭  
旁有泉取以澆茶有異香每歲驚蟄日有司致祭祭

畢鳴金擊鼓臺上揚聲同喊曰茶發芽于是井泉既  
滿用以製茶上供其泉名石吼又名通仙又名喊泉  
又名呼來泉也此亦取雷生物之義 福安縣有雷

驚竹

崔豹言蝦蟇聞雷則尾脫而脚生然皆脚具

而尾始脫 埤雅神仙服食法云車前之實雷之精

也善療婦人難產及令人有子 玉真先生曰陽氣

爲雷陰氣爲霆雷有聲霆無聲雷性善霆性惡雷好

生霆好殺如此則雷之生物昭昭矣 蕭大亨纂俗

考云其俗最忌無過于痘瘡凡患痘瘡無論父母兄

惡其于一切避匿不相見調護則付之漢人如無漢人則以食物付之他所令患痘者自取之也至若夫妻之患痘也必俟聞雷聲然後相聚不聞雷聲則終身避匿如路人然其地寒患痘者少豈以雷能生物而且辟不祥故患痘之後必聞雷而後夫婦如初耶

知道者不言命相

命與相古今相傳有之然知道之士行素居易而已  
置而不言可也晉顏含爲光祿勳以老遜位郭璞常  
欲爲之筮含曰年在天位在人修已而天不與者命  
也守道而人不知者性也自有性命無勞著龜致仕  
二十餘年年九十卒 五代時扈載有文名常遊相  
國寺見庭竹可愛作碧鮮賦題壁間周世宗命小黃  
門錄進覽之稱善王朴九重之薦于宰相李穀穀曰  
卦不知其人然恐命薄不能勝朴曰公爲宰相以進

賢退不肖爲職何言命乎乃拜知制誥爲學士居歲  
餘果卒 朱文公遊山寺逢僧談命詩云此地相逢  
亦偶然漫將牛斗話因緣時行時止非人力莫問流  
年祗問天 楊敬仲謂真西山曰希元有志學問顧  
未能忘富貴利達何也希元恍然不知所識先生徐  
曰子嘗以命訊日者故知之 冷齋夜話徐師川曰  
陳瑩中大節昭著其能必行其志者視爵祿如糞土  
然猶時到日者說命此未免顛倒也 閩書宋廖德  
明字子晦少學釋氏及得楊龜山書讀之大悟遂受

業朱文公始德明諸生時乞夢大乾廟見懷刺候謁  
題曰宣教郎既舉乾道五年進士以宣教郎出莆田  
憮然不欲赴文公曰成毀有數凡物則爾人則趨向  
不同禍福隨變克廣德性力行善事吾子事也又何  
疑夢德明拜受教至縣有聲累知潯州選廣東提舉  
刑獄徙知廣州遷吏部左選郎官奉祠卒 見聞錄  
常德蔣正學先生諱信號道林王陽明先生赴謫龍  
場驛寓郡西潮音閣有醫氏杜仁夫携其復春詩卷  
以謁先生常題絕句云安排必定非由我變理從來



自屬人堪嘆世人渾不解九還丹裏苦偷生陽明先生驚曰此人有志十分端確者常語人曰如卿實便可作顏子矣北史魏耿玄善卜占而時有王公欲求其筮玄輒拒不許每云今既貴矣何所求而復卜欲望意外乎又念賢枹罕人少時在學遇善相者衆競詣之賢笑曰男兒生死富貴在天何屬相爲魏永熙間歷官都督秦河二州刺史七修類稿柳庄袁珙字廷玉元菑先生士元之子自幼勵精儒業九流百氏之書靡不究覽常遇異僧別古崖于普陀

落伽山授以相術期珙必以術顯遇靖難再造拜太  
管寺丞已而得請展省先塋壽七十六卒姚少師廣  
孝常贈詩云岸幘風流閃電眸相形何似相心優凌  
烟閣上丹青裏未必人人盡虎頭 孔氏雜說相之  
不可憑也南史庾華傳庾家富于財食必列鼎又  
狀貌豐美頤頰開張人皆謂必爲方伯及魏尅江陵  
復以餓死時有水軍都督褚羅面甚尖危縱理入口  
竟保衣食而終唐柳渾十餘歲有巫告曰兒相天且  
賤出家可免死柳不從仕至宰相魏朱建平善相鍾

繇比之唐舉許負然相王肅年踰七十位至三公肅六十二終于中領軍故吾以爲相不可憑也 南史

徐陵入歲屬文十三通莊老光宅寺慧雲長老每嗟陵早死陵仕至太子少傅年七十七唐孔若思傳孔李詡擢制科授校書郎陳子昂常稱詡清韻遠可比衛玠而詡終于左補闕使徐陵夭而不壽李詡遂至顯官則人遂以爲風鑑可驗矣吾以此知風鑑之不可憑也 清波雜志晁文元平生不喜術數之說每

謂自然之分天命也

樂天不憂知命也推理安常委命也何必道命不然也

聞書陳彥才字用中平陽人宣和進士秦檜寓永嘉  
彥才與隣不謁也後檜再相以年老註邑連江彥  
才與檜生辰偶同戲作詩曰命賤安能比鉅公偶然  
年月日時同只因日上差些子甘向連江作釣翁後  
歷徙知泉州 彙苑唐德宗曰建中之亂卿亦知桑  
道茂語乎乃命當然李泌曰夫命者已然之言君相  
造命不當言命言命則不復賞善罰惡矣 又邵康  
節先生出行不擇日或告之以不利則不行曰人未  
言則不知既言則有知而行故鬼神爲難也 晉穆

帝納后欲用九月是忌月王彪之云禮無忌月 七  
修類稿沈石田周與同郡盧知縣鍾年月日時皆同  
而仕隱不同沈雖不仕而清名勝之吳參議鼎與徐  
憲之子應祥亦同年月日時吳旣貢而子亦登賢書  
徐于二者皆無而亦未見有勝之者

古今勝蹟猶可追尋

劇談錄陶淵明所記桃花源今鼎州桃花觀卽是其處余雖不及至數以問湖湘間人頗能言其勝事云自晉宋來此山上昇者六人山十里間無雜禽惟二鳥往來觀中未嘗有增損鳥新舊更易不可知耆老相傳自晉迄今如此每有貴客來鳥輒先號鳴庭間人率以爲占淵明言劉子驥聞之欲往不果子驥見晉書隱逸傳卽劉驥之也子驥其字耳傳子驥採藥衡山溪入忘反見一澗水南有二石圀一閉一開者

水溪廣不可過或說此其間皆仙靈方藥諸雜物既還失道從伐木人問徑始能歸後欲更往終不可得  
大類桃源事 宋鄭至道劉阮洞記云予求劉阮洞

按圖而至護國寺僧介豐曰洞居寺之東北二里隱于榛莽尺跡罕及景祐中先師明照大師常采藥見金橋跨水光彩眩目二女未笄戲于水上如劉阮所見此水仙之洞府也 名勝記台之委羽山空明洞天長老言常有素服靚妝飄飄若仙之女者當風清月白時則逍遙乎松杉竹栢之下或時變臘卽里人

門求水火里人密覘之迤邐從洞中去里人以為怪  
糞其地越數日里人家夜失火室宇一空妻子僅以  
身免皆流離他處識者以為厭穢仙靈故也自是仙  
女不復出 常德府桃源縣蟠桃巷宋大中祥符間  
邑人開地見土龕光色照耀得大果九枚識者引漢  
武內傳及博物志以為蟠桃 偃曝餘談云趙文鑑  
平涼人言其家去崆峒山四十里舊常與張同知遊  
見山中二玄鶴高七八尺首大如瓜視常鶴不啻加  
倍飛鳴上下趙武臣欲彎弓射之張不可乃止遂飛



入洞中歸以語其祖祖驚曰此千歲鶴也汝何幸見之  
留青日札云具區東山有井淵深叵測世呼柳毅井卽唐所傳洞庭君女柳毅傳書事言至今風月  
夜往往見雙雙出遊嘉靖辛丑中書舍人王某與友  
人同遊酒酣因吟曰橘花垂蔭碧欄干此地曾經柳  
毅傳卿亦有書吾肯寄汲溪千尺轆轤懸時林月漸  
明隱隱見橘柚影中一美人掩映若隔烟霧却前遙  
吟曰橘花如雪晚風清迢迢隔山春夢驚明月一天  
涼似水不堪重省舊時情卽追討其跡杳不可得質

明欲闢地祠之鋤下鏗然有聲得一石碑題曰龍井  
神女祠因建宇于其上方輿勝覽閩縣東山有榴  
花洞唐永泰中樵者藍超遇白鹿逐之渡水入一石  
門始極窄忽豁然有鷄犬人家主翁謂曰吾避秦人  
也留卿可乎超云欲與親舊訣乃來與榴花一枝而  
別恍然若夢中再往不知所在此與桃源人又別是  
一種人家

## 茶與韭墨相反

舊傳茶有百損惟益于目韭有百益惟損于目予聞  
二物同食可以損益相資而壺居士食忌云苦茶久  
食羽化與韭同食令人體重則與韭之相反而不爲  
用者有如此溫公與子瞻論茶墨云茶與墨二者正  
相反茶欲白墨欲黑茶欲重墨欲輕茶欲新墨欲陳  
子瞻云上茶妙墨俱香是其德同也皆堅是其操同  
也譬如賢人君子黔皙好醜之不同其德操一也溫  
公以爲然陳眉公云採茶欲精藏茶欲燥烹茶欲潔

製墨欲精藏墨欲燥用墨欲潔茶見日而味奪墨見日而色灰墨磨隔宿則色暗茶碾過口則香減是茶與墨相反而又有相同者如此 茶譜云鄧州東山茶黑色如韭食之已頭痛與韭相反而又似韭且有功用如此 北戶錄水韭生池塘中葉似韭得非龍爪韭乎字林云葢音嚴水中野韭也又字林吟音吟似韭生水中 本草葢音育戴音纖皆由韭名又有孝文韭諸葛韭葢吟葢載四字他處所無 蕭大亨羹俗考其俗食肉類皆半熟以半熟者耐久且養人

也肉之汁卽以煮粥又以烹茶茶肉味相反彼亦不  
忌得非以其一補一損相反而可以相資耶 蘇東  
坡云茶可于口墨可于目蔡君謨老病不能飲則烹  
茶而玩之呂行甫好藏墨而不能書則時磨而小啜  
之此又用茶用墨者之相反也 按茶能損人固矣

唐新語綦母旻曰釋滯消壅一日之利暫佳瘠氣耗  
精終身之害斯大獲益則歸功茶力貽患則不謂茶  
灾蘇東坡亦云除煩去膩世固不可以無茶然暗中  
損人殆爲不少顧歷考古來用茶不特愈病而且以

延年并鬼神亦歆其佳味者則又何哉 蠻旣志云

隋文帝微時夢神易其腦骨自爾腦痛忽遇一僧云  
山中茗茶可治帝服之有効于是天下始知有茶

茶譜云蜀之雅州有蒙山山上有五頂頂有茶園其  
中頂曰上清峯昔有僧病冷且久嘗遇一老父謂曰  
蒙之中頂茶嘗以春分之先後多搗人力俟雷之發  
聲併手採摘以多爲貴三日而止若獲一兩以本處  
水煎服卽能祛宿疾二兩當眼前無疾三兩因以擦  
背四兩卽爲地仙僧因之中頂築室以候及期獲一

兩餘服未竟而病瘥年至八十餘氣力不衰時到城  
市人觀其容貌常若三十餘肩髮紺綠後入青城不  
知所終今四頂茶園不廢惟中頂茶木繁茂重雲積  
霧蔽虧日月鸞獸時出人跡罕到矣 神異記云餘  
姚虞洪入山採茗遇一道士牽三青牛引洪至瀑布  
山曰吾丹丘子也聞子善具飲常思見惠山中有大  
茗可以相給子他日有甌犧之餘乞相遺也洪因設  
奠祀之後常令家人入山獲大茗焉 清異錄沙門  
福全能注湯幻茶成詩一句並點四甌共一絕句泛

乎湯表檀越造門求觀湯戲全自咏詩日生成盞裏  
水丹青巧畫工夫學不成却笑當年陸鴻漸煎茶羸  
得好名聲 茶譜胡生者以釘鉸爲業居近白蘋洲  
旁有古墳每茶飲必奠酌之忽夢一人謂曰吾姓柳  
平生苦爲詩而嗜茶感子茶茗之惠無以爲報欲教  
子爲詩胡生辭以不能柳強之曰但率子意爲之當  
有致矣生後遂工詩時人謂之胡釘鉸詩 吳苑陳  
務妻少寡與二子同居好飲茶家有古塚每飲輒先  
祀之二子欲掘視母止之夜夢人致感云吾雖潛身



朽壤豈忘翳桑之報及曉于庭中獲錢十萬似久埋  
者惟貫新耳。廣陵耆舊傳晉元帝時有老嫗每日

擎一器茗往市鬻之市人競買其器不減所得錢盡  
散路旁孤貧乞人人或繫而繫之于獄夜擎賣茗器  
自牖飛去。李太白云予聞荊州玉泉寺近清溪諸

山山洞往往有乳窟中多玉泉其水邊處處有茗草  
羅生枝葉如碧玉惟玉泉真公常採而飲之年八十  
餘歲顏色如桃李而此茗香清異于他者所以能還  
童振枯令人壽也予遊金陵見宗僧中孚示余茶數

十片狀如手掌。號仙人掌茶。蓋新出于玉泉之山。曠古未覲。因特見遺。兼贈詩要予答之。以上數則合觀。爲仙爲鬼皆好飲茶。未可盡謂其能損人也。按本草。韭之爲物。生則辛而散痰。散血。熟則甘而補中。補腎。然則生韭頗與茶之功用相同。天台記云。丹丘出大茗。服之能生羽翼。陶弘景雜錄。苦茶輕身換骨。昔丹丘子黃山君服之。纂要云。蜀雅州蒙頂茶。受陽氣全。故芳香。其生最晚。當在春夏之交。方茶生時。常有雲氣覆其上。若神物護持之。李德裕入蜀。得蒙

餅以沃于湯瓶之上移時盡化以驗其眞蒙頂又有  
五花茶其片作五出 又山韭生大石罅中可  
療心疾 瑯環記云昔有客過茅君時當大暑茅君  
于手巾中解茶葉人與一葉客食之五內清涼異常  
詰其所從來茅君曰此蓬萊山穆陀樹葉衆仙食之  
以當飲又有寶文之蔬服之不飢謝幼貞曰摘寶文  
之初蓋拾穆陀之墜葉 南部新書大中三年東都  
進一僧年一百二十歲宣王問服何藥而致此僧對  
曰臣少也賤素不知藥性本好茶至處惟茶是求或

一日過百餘椀如常日亦不下四五十椀因賜五十斤令居保壽寺 水經注交州平樂山多龍穴旁生野韭人往乞者神許則風吹制分隨偃而拔不得過越不偃而拔輒凶也茶有神靈豈非亦有神靈耶 諸葛孔明教張君弼曰去婦不顧門葵韭不入園以婦人之性葵韭之情猶有所耻想忠壯者意何所之茶不再移移他所輒葵而韭亦有同耶

因敗爲功

古來名將因兵敗之後反成大功者後世多置不講  
其氣餒一敗則不可收拾亦暗于兵機不能料敵  
故也近時頗講求其事惟行師之久而諸練精透故  
耳蓋勝則驕驕則必怠敗則憤憤則必銳惟淡于兵  
機者可與言之 左傳成公十六年鄭公子喜帥師  
伐宋宋將鉏樂瞿敗諸洧陂宋師舍于夫渠不做喜  
覆而敗之于洧陵獲將鉏樂瞿宋恃勝故也 三國  
志魏賈詡常歸張繡會曹操征繡未幾忽引退繡自

追之詡曰不可追必敗繡不從大敗而還詡曰促更  
追之必勝繡曰已敗奈何復追詡曰兵勢有變往必  
利繡乃急收散卒復追遂大勝繡還問曰吾以精兵  
追退軍而公曰必敗後以敗兵擊勝兵而公曰必勝  
何也詡曰此易知耳將軍兵雖精非曹公敵也曹公  
雖退必自斷後將不敵故知必敗曹公攻將軍力未  
盡而退必國內有故既破將軍速進留將斷後諸將  
亦非將軍敵故必勝也繡乃服 晉史盧志爲成  
都王穎謀主是王倫反穎起義兵而前鋒爲倫所敗

士衆震駭。議者多欲還保朝歌。志獨曰。敵兵新勝。必有輕我之心。今宜選精兵。星行倍道。出賊不意。此用兵之奇。賴從其言。遂破倫。王銍默記云。宋太祖爲檢點時。以周軍數千與南唐皇甫暉戰于滁州。清流澗隘路。周師大敗。村中有鎮州趙學究。普者。教學多智。太祖微服往逐之。學究曰。我有奇計。可以因敗爲功。關下有逕路。人無行者。乃山背也。可以直抵城下。方阻西澗。水大漲。彼戰勝而驕。必謂我不敢躡其後。慢不爲備。可以得志。太祖卽帥師夜出小路。浮西澗。

以逼城。暉果不備。奪門而入。暉巷戰。三縱而三擒之。遂下淦州。宋史。姚平仲謀劫金人之寨。欽廟以詢种夔叔。夔叔持不可甚堅。平仲敗夔叔。乃請速再擊之。曰。今必勝矣。或問平仲之舉。爲金人所笑。奈何再擊。夔叔曰。此其所以必勝也。五代梁史。晉戰五柳坡。晉兵敗。莊宗欲引兵退保臨濮。閻寶曰。夫決勝料勢。決戰料情。情勢卽得。斷在不疑。今梁兵窘蹙。其勢可破。勝而驕怠。其情可知。此不失之時。莊宗曰。微公幾敗吾事。整軍復戰。遂敗梁兵。



昔賢有當時無名而後世反得其名者

古賢之以事功德行傳而其名反泯沒無聞者不可  
勝數孔子曰作者七人而魯陽子註之曰必求其人  
以實之則鑿矣此則絕大感見而可與考古者乃有  
當時無名而後人往往著見其姓氏謂之何哉其間  
未必無訛然亦因而存之矣梁伍安貧武陵記云  
晉太康中武陵漁人黃道與泛舟自沅溯流而入道  
真既出白太守劉歆遣人其往則已迷路與陶記畧  
同但陶止稱漁人而不言其名戒菴漫筆云史止稱

楊王孫耳西京雜記云楊實字王孫史止稱文翁耳  
張崇文歷代小誌云文翁姓文名黨字仲翁史止稱  
壺關三老耳荀悅漢記云壺關三老令狐茂 高似  
孫緯畧云司馬彪莊子注曰箕子名胥餘書傳所不  
載 瑯環記引玄虛子仙志云臨邛道士爲明皇致  
楊太真者其人姓王名舟不知何許人而長恨歌註  
中失載其名 古今考云後漢章帝記祠太上皇于  
萬年縣注太上皇名煬一名執嘉此不知何所據而  
遷固乃不及之恐亦未可信也 廣川書跋云歐陽

公嘗言固始孫叔敖碑言叔敖名饒非此碑人幾不知叔敖名饒矣余求于書自漢安順後諸儒競爲異說使學者奇偉所聞如伏生爲勝毛公爲萇子賤爲宓此皆西漢所不書也 吳匏菴詩云西飛孤鶴記

何詳有客吹簫楊世昌當日賦成誰與註數行不刻舊曾藏楊世昌者綿竹道士與東坡同遊赤壁所謂客有吹洞簫者卽其人也按玉局文云元符三年十二月十九日東坡生日置酒赤壁下酒酣笛聲起江上使人問之卽進士李委聞坡生日作鶴南飛曲以

獻奏曲嘹唳有穿雲裂石之聲然則吹洞簫者又另

一人也 書蕉云東園公姓唐名秉字宣明陳留襄

邑人綺里季姓吳名寶字子景夏黃公姓崔名廣

云名鄺字少通角里先生姓周名術字元道隱商洛

山爲四皓 孔氏叢說云鄭子真名樸 莊周字子

休 嚴君平名尊 杜康字仲宣 伯夔名墨信字

公光叔齊名墨智字公達出論語疏引春秋少陽篇

左傳第言介子推而纂要云王光號介子推 青

藤路史云毀仰墨及譽岡大夫者其人名周破胡

子英乘鯉魚有超翼角見事文類聚子英上無姓是  
一國君見路史子卽姓耶湯之姓爲子 徐偃王名  
誕見嘉興志 巨靈劈華山自古傳之矣而法苑珠  
林云雍州郿縣南繫頭山者其山本舟人繫船其頂  
故以名焉太乙未分山海太行王屋白鹿河水停于  
此川號爲山海及巨靈大人秦俱海者患水浩蕩以  
左掌托太華右足踏中條太乙爲之裂河通地出山  
遂高顯非法苑珠林則不知巨靈之爲秦俱海矣

三十六七十二之數

週天三百六十五度故一年爲三百六十五日先大  
三十六之數也一年有十二月十二節氣十二中氣  
此三十六之數而又有七十二之候焉三十六倍之  
而爲七十二又倍之而爲一百八矣八卦成而共爲  
三十六畫重卦錯綜反覆之而六十四亦成三十六  
是云三十六宮都是春也萬物及人事多有不能離  
乎三十六之數者 青城山在灌縣西南五十里山  
有七十二小洞應七十二候有八大洞應八節道書

以此山爲第五洞天乃神仙都會之府天下共有三十六洞天七十二福地 峨眉山有七十二穴雷神居之時出雲雨 戴延之西征記嵩山三十六峯東曰太室西曰少室相去十七里嵩其總名也 邛州大邑縣鳴鶴山亦有七十二穴 武彛山峯巒大者三十六 新安黃山有三十六峯 陝西鳳縣紫柏山上有七十二洞異人多隱此 江西廣信府城西北有靈山山有七十二峯郡之鎮山道書第三十三福地 湖廣司空山在攸縣東四十五里南接雲陽

連山峻拔左右三十六峯舊名麒麟山亦名溫泉山  
南齊司空張岳隱此改今名 陝西仇池山在鞏昌  
府成縣西北一百里四面壁立峭絕險固自然有樓  
櫓却敵狀上有平地二十餘里羊腸盤道三十六廻  
有豐水煮土成鹽 湖廣太嶽太和山在均州南山  
有七十二峯三十六巖二十四洞 江西金谿縣雲  
林山翠峯數百仞界撫信建昌三郡其形勢爲金谿  
之巨鎮山上有三十六尖故曰三十六峯 浙江長  
興縣浮雲山山上有七十二墩久旱山頂生浮雲卽



兩 浦江縣東三十五里有三十六岡其山重巒複  
峯高低不齊前後相屬者三十有六 洞庭山蘓舜  
欽水月院記中有山七十二惟洞庭稱雄 彭湖嶼  
在泉州府城東出海舟行三日在巨浸中環島三十  
六 湖廣三十六灣水在湘鄉縣南本湘江北流至  
縣門逕江口乃分一派東流爲三十六折唐許渾詩  
縹緲臨風思美人荻花楓葉帶離聲夜深吹笛移船  
去三十六灣秋月明 名勝志廣東龍川縣北百里  
有霍山舊經云高七十餘丈周圍三百六十里峰有

三百六十可居者七十二其最著者曰太乙巖廣  
西賀縣北二十里有七十二峯攢奇競秀其中多橘  
是曰橘山袁宏後漢記李催郭汜繞營叫呼吏士  
失色各有分散意李樂懼欲令車駕御船過砥柱出  
孟津楊彪曰臣弘農人知自此以往有三十六灘非  
至尊所宜登吳江東門外長橋有七十二洞舊志  
垂虹橋東西千餘尺橫跨淞江前臨太湖乃吳江絕  
景也。

李石續博物志云孔安國撰孔門弟子七十二人劉

向傳列仙亦七十二人皇甫士安撰高士亦七十二人陳長文撰耆舊亦七十二人後漢書徐偃王好

仁義陸地而朝者三十六國後漢英雄記曰漢陽

王國等起兵劫故信都令王統三十六部號

車騎將軍漢書景帝時吳楚七國反書問天子遣

太尉條侯周亞夫將三十六軍往擊吳楚後漢書

班超以假司馬使西域與其吏士三十六人縱火圍

匈奴使者超手格殺三人其吏斬其使及從士三十

餘級餘衆百餘人悉燒死帝遂以超爲軍司馬令遂

前功超受使實固欲益其兵超曰願將本所從三十  
餘人足矣後果威震絕域按超所率吏士三十六人  
其後所通者亦三十六國 又耿恭守疏勒孤城食  
盡窮困乃煮鐵弩食其筋革恭與士推誠同死生故  
皆無二心而稍稍死亡餘數十人單于遣使招恭恭  
乃誘其使上城手擊殺之炙諸城上酋長望見號哭  
而去朝廷從司徒鮑昱之議遣王蒙等救之蒙已勝  
車師欲引兵還先是恭遣軍吏范羌迎兵士寒服羌  
因隨王蒙等俱出塞羌固請迎恭諸將不敢前乃分

兵二千人與羗從出北迎恭遇大雪丈餘軍僅能至  
城中夜聞兵馬聲畏爲匈奴兵來大驚羗乃遙呼曰  
我范羗也漢遣軍迎校尉耳城中皆呼萬歲開門共  
相持涕泣相隨俱歸匈奴追之且戰且行吏士素飢  
困發疏勒時尚有三十六人隨路死歿三月至玉門  
關惟餘十三人 徐溫傳楊行密起合肥所與起事  
劉威陶雅之徒號三十六英雄後都揚州 宋史宋  
江起爲盜以三十六人橫行河朔轉掠七郡官軍莫  
敢犯其鋒知亳州錢蒙上言江才必有過人者不若

赦之使討方臘以自贖此宣和三年事也湖小說家  
演之以三十六爲天罡星七十二爲地煞星共一百  
單八人而宋史止言三十六人淮安文獻志有載三  
十六人名號而各爲一贊乃龔聖俞作又甕天腔語  
言宋江潛至李斯家題詞于壁有六六雁行連八  
九則似真又有此七十二人者矣宋嘉定八年淮浙  
江東西飢都昌飢民聚爲盜者二十六黨元史至  
正七年集慶路沿江盜起有司莫能禁兩淮運使宋  
文瓚言戍將非人致賊艦往來無常集慶花山賊才

三十六人官軍數萬不能進討反爲所敗後竟假手  
鹽徒雖能成功豈不貽笑遠近宜急選智勇以圖後  
功不然則東南財賦恐非國家所有也 輟畊錄云

中原紅寇未起時花山賊三十六人內一婦女尤勇  
健聚茅山一宮縱橫出沒三省撥兵不能收捕殺傷  
官兵無數朝廷召募鹽徒率其黨與一鼓而擒之後  
此天下之人視官兵爲無用 四友齋叢說云嘉靖  
乙卯倭賊從浙江繇嚴衢過杭州歷徽寧太平而至  
金陵纔七十二人耳南兵與之對兩陣殺二把總指

揮軍士死者八九百此七十二人不折一人而去

後漢書明帝中平元年二月鉅鹿人張角自稱黃天  
將軍部帥有數千餘萬皆着黃巾分爲三十六方大  
方萬餘人小方六七千同日反叛 管仲曰古者封  
泰山禪梁父七十二家而敬仲所記者十有二焉

蘇東坡詩云西湖天下景遊者無愚賢淺深隨所得  
誰能識其全三百六十寺幽尋遂窮年所至得其好  
心知口難傳 名勝志興化南木蘭山下其水自泉  
州西南而下合澗谷之水三百六十會流于此宋李



長者築陂溉田千餘頃莆人賴之

鯉魚無論大小皆

三十六鱗

天中記天有九天每一天俱列置三天

合爲三十六天玉樞經曰玉霄一府所統三十六天

長沙志衡山軒翔聳九千餘丈尊卑差次七十二

峯

天中記崑崙者地之中也地下有八柱柱廣十

萬里有三千六百軸互相牽制名山大川孔穴相通

又天目山有湖三十六每秋有一月風雨晦暝土

俗云是山與江神會也

麻姑紫壇歌女媧鍊得五

方石變化成形補天地三十六變世應知七十二化

處其位 天中記神農嘗百草一日百死百生其所  
得二百六十物以應周天之數 秦始皇分天下爲  
三十六郡 柳子厚遺何蕃書曾參徒七十二人致  
禍負芻然則曾子之徒亦七十二人耶 人有三百  
六十骨節 房陵定山有朱仲李園三十六所李尤  
果賦云三十六園之李 安慶府志浮山在懷寧縣  
東九十里一名浮渡山有三十六巖七十二峯可居  
可遊

以設官爲戲

設官分職無非代君理民觀周禮一書設其官而命之名皆有深意非偶然者後代多有隨意命官而近于戲者夫天子無戲言而況于設官乎因彙而考之

曹操時置發丘中郎將 南齊書虞愿先事宋明

帝帝體肥憎風夏月嘗着皮小衣拜左右二人爲司風令史每風起方面輒先啓聞愿爲其官 南史羊

玄保爲黃門侍郎善奕棋品第三帝亦好奕與賭郡立保戲勝以補宣城太守齊明帝好圍棋置圍棋州

邑以建安王休仁爲園棋州都大中正中書侍郎王  
湛與太子石率沈勁尚書永部郎庾珪彭城丞王抗  
四人爲小中正朝請褚思庄傳楚之爲清定訪問  
玉座集云唐穆宗宮中牡丹花開則以重頂帳蒙蔽  
欄檻置惜春御史掌之號曰括香 開元十年十二  
月太子中允張怱充知搜訪書畫史天寶中徐湛充  
搜訪圖書史陶隱居啓梁武帝曰愚固博涉患未能  
精苦恨無書願作主書令史 草木狀云漢武帝時  
交趾有橘官長一人秩二百石主貢御橘

李涪云則天寵侍御者張景宗其官號曰控鶴監

吳志孫皓天紀二年有鬼目菜生工人黃耆家依綠  
棗樹長丈餘莖廣四寸厚三分又有買菜生工人吳  
平家高四尺厚三分如枇杷形上廣尺八寸下莖廣  
五寸兩邊生葉綠色東觀按圖名鬼目作芝草買菜  
作平慮草遂以耆爲侍芝郎平爲平慮郎 嶺南異

物志交趾橘多置長官一人秩三百石至歲貢御橘

三國典畧云齊高緯以波斯狗爲赤虎儀同逍遙

郡君以梁肉食縣邑常于馬上設登褥以抱之其御

馬皆籍以璫屬被以金玉食物有十餘種號爲駁龍  
儀同其將合牝牡則設青廬繡帳牢甚過于諸王婚  
禮齊主常親視焉又以鷹爲凌霄郡君 五代史劉  
晏據太原與契丹約爲兄弟契丹以黃驢馬爲聘後  
與周世宗戰高平敗獨乘黃驢以歸遂與黃驢治祿  
餼以金銀食以三品料號自在將軍 金主亮常所  
御小驢號小將軍

遺骨之異

人之精魂既化而遺骨未卽速朽淺識者以爲冥漠  
無知之物然亦有不可變視者成化間宦官來定飯  
于海子口楊樹之下見樹邊一骷髏以生薑一片置  
骷髏口中問曰誰舌隨聞應聲曰辣定驚躍跨馬卽  
歸隨問辣辣之聲入耳不已臥病數日而卒凡江濱  
沙渚有骷髏暴露于地者牧豎虐戲溺小水于其口  
中爲之作禮則骷髏隨其身而滾行以石擊碎乃已  
則安可以其無知而欺之耶夫掩骼埋胔見于月令

古之仁王于鳥獸之遺骸尚收掩之況人爲同類漫  
不經意其可哉 鈎玄云秘書郎喬中山言至元十  
年自東曹掾出使延安道出鄜州土人傳有杜少陵  
骨在石中者因往觀之石在州市色青質堅樹于道  
旁有人骨一具跌坐若自生成與石立化以佩刀削  
之眞人骨也然何據而稱爲杜少陵之骨乎 尚書  
故實云公常于貴人家見梁昭明太子腦骨微紅而  
潤澤抑異于常然何據而稱爲昭明太子之骨乎

文昌雜錄華岳山張超谷巖石下有僵屍齒髮皆完



春時遊人多以酒酒口中呼爲臥仙好事者作木榻  
以薦之嘉祐中有石方十餘丈自上而下正塞巖口  
豈非仙者所蛻山靈護之不欲人褻慢耶 明道雜  
誌長安有安姓者家得明皇髑髏光作紫金色其家  
事之甚謹因爾家富甲于長安遂爲巨族後其家析  
居爭髑髏遂斧爲數片人分一片而去余因謂之曰  
明皇生死爲姓安人極惱合坐大笑 一統志武彝  
山有巖巖中半壁有石室室前有黃心木如橋上列  
置蛻面中藏仙蛻皆赤小而紅色世傳方外之士得

道尸解悉于此蛻骨 山堂肆考云武彞山神漢世  
祀以乾魚不知果何神也今在崇安其山卽人所宅  
峰巒巖壑秀拔奇偉兩岸絕壁人不到處往往有枯  
槎插石罅間以度舟舩棺柩之屬柩中有遺骸外列  
陶器皆未壞疑前世道阻未通川壅未決時蠻獫  
所居而漢所祀者卽其君長蓋亦避世之士爲衆所  
臣服而傳以爲仙也 長沙蒲圻縣有呂蒙塚人共  
見其塚中有一髑髏極大疑卽蒙髑髏也 永嘉五  
年張榮之爲平戍邏主時值曹炎賊寇亂毘山中火

起人馬鎧甲聲謂疑賊上巖出欲擊之到山無人胡  
日往視惟見髑髏百頭布散山中東觀漢記陳寵  
字昭公爲廣漢太守先是雒縣城南常有鬼哭聲寵  
使吏案行還言昔歲倉卒時骸骨不葬者多寵乃勅  
縣收葬由是遂絕鐵圍山叢談云蔡京于崇寧末  
以使相就第賜第闔闔門外俗號梁門修築之際往  
往得唐人舊塚誌文又多得婦人脛骨率長于今時  
男子長大幾寸焉或謂常觀陝晉間古長平爲秦白  
起坑趙卒處白骨尚存其脛長大異隋唐時知今人

瘦小短釋氏之語或不妄 述異記陳留周氏婢名  
興入山取樵忽夢見一女子曰吾目中有刺煩爲拔  
之當有厚報乃見朽棺觸體草生眼中便爲拔草卽  
于其處得一雙金指環 伽藍記那迦羅阿國有佛  
頂骨方圓四寸黃白色下有孔受人手指閃然似仰  
蜂巢玄奘傳醯羅城中有佛頂骨廣尺二寸其相仰  
平形如天蓋佛髻蓋如荷 槃佛眼圓睛狀如柰許  
澄淨皎然有佛大衣其色黃赤佛之錫杖以鐵爲環  
紫柁爲筭此五聖迹同在一城 天中記會稽有訪

風鬼屢見城邑常跋雷門上脚垂至地晉橫湯合賀  
韜鼓琴防風聞琴聲在賀中庭舞夫吳王發地而得  
專車之骨以問孔子孔子對之以爲此防風之骨矣  
乃得有鼓雷門上而脚垂至地者又是防風氏何哉  
天中記嵇叔夜康少嘗晝寢夢人身長丈餘自稱黃  
帝伶人骸骨在公舍東三里林中爲人發露如爲葬  
埋當厚相報康至其處果有白骨脰長三尺餘遂收  
葬之復夢長人來授以廣陵散曲及覺撫琴而作其  
聲其妙都不遺忘 幽怪錄云和初建陽縣界山中

墜仙人棺棺中脛長六尺青如玉 上清宮雜記

云龍虎山東偏岩罅舊有三棺巖壁峭立深溪中非  
人跡可到往記爲仙蛻葬此或壞因風雨雷電則復  
如初或云堯時民避水遺跡云元至正間居民繫  
長繩大樹上懸竹籠坐一人其中稍至岩前以長鉤  
鉤斷二棺皆柁木所製一棺中有玉連環見宋洪芻  
明危素諸記至今一棺猶存製若床厨以有門可開  
闔色若淡黃檀香或方如木匣長如木屑坐落各岩  
隙 繪圖云武彝山接筍峯下有壁朝以來蛻仙共

一十四軀居民供養藏諸石龕  
歲遇大旱迎歸其  
家禱雨立應賽謝畢明日將具  
加鼓送還故處則蛻  
仙夜中自歸塢中石龕不失位  
天其靈異如此又武  
義山有水簾四十里行至山麓  
攀折而上如在半空  
逶迤又過水涯道院見一龕石  
罅中訊之道士云此  
嘉靖十年廣信府曉仙也俗呼  
魔仙甚清癯肌如腊  
目如電皮毛爪髮宛若生有御  
史某來易其處號曰  
昇仙

人之元神

仙傳拾遺云馬周華山素靈宮仙官也唐氏將受命  
太上勅之下佐于國而沉溺于酒汨沒風塵間二十  
年袁天綱相其將死教之隨騎牛老叟入山叟顧見  
之謂曰汝本素靈宮仙官今太華仙王召汝卽引入  
宮闕至簾前有宣言責之者使人送之別院中觀其  
門則姓名在焉忽有五人服五方之衣立于前曰我  
輩皆先生五藏神也先生酣酒流蕩濁辱于身我等  
久歸此矣但閉目將復于神室也周瞑目久之忽覺



心智明悟并憶前事二十餘年若旬日之間耳貞觀  
中累居大任一旦群仙降其室曰佐國功成可以退  
矣太乙徵命無復留也翼日無疾而終 洛中記異  
云唐高祖起兵至霍邑夢甲馬無數飛滿空中帝問  
是何軍伍對曰是公身中之神也若無此何以威制  
天下言訖並飛入帝身 南部新書河東裴章者其  
父曹常鎮荊州僧曇照道行甚高能知休咎章幼時  
爲照所重其官班位望過于其父章弱冠父爲娶妻  
李氏女及四十餘章從職太原竟棄妻子洛中過門

不入。別有所牽。李氏自感其薄命。常剃髮。誓讀佛書。蔬食。又十年。嚴綬尚書自荊州移鎮太原。雲照隨之。章因見照。叙舊。久之。謂曰。貧道五十年前言。即君必貴。今則不然。何也。章因以薄妻之事啓之。照曰。夫人生魂。懇于上帝。以非命處君。後旬日。其下以刃割腹。于浴器中。五臟墮。傷風遂死。生魂能懇上帝。此亦前所未聞。生魂豈卽元神耶。廣五行記。北齊文宣天保年。御史李廣。勤學博物。夜夢見一人出于其身中。謂廣曰。我心神也。君用心過苦。非精神所堪。今辭君。

去因而恍惚數日。便遇疾。積年而終。桓譚新論。揚子雲于成帝時。上幸甘泉宮。召使作賦。子雲爲之卒。暴倦卧。夢其五臟出在地。以手收內。及覺。太少氣。病一歲卒。珍珠船云。江淹夢神人授五色筆。識者謂卽五臟神。眉公見聞錄。中官馮保客徐爵。久奉長齋。其未得罪之前一年。忽見寸許童子行几上。驚問之。童子曰。吾乃汝之五臟神也。汝不破齋。不得禍。否則禍旋及矣。已而蒲州相公召飯。強之食。始破葷血。未幾遂以論奏逮下獄。又是文公晚年。常日見其形在前。既久。漸小。八十年後。每在眉睫之間。

鳳麟有種

人家有令子則稱之曰鳳毛而毛詩云麟之趾振振公子麟之角振振公族麟之定振振公姓則是鳳麟未嘗無種也抱朴子曰麟鳳以形狀爲別聖人以心神爲異太平之世鳳凰常居其國而生乳至夏后始食卵而鳳凰去之此則鳳有種明矣 鎮江府志云萬曆二十一年丹徒唐里灣民朱旺一家牛產麟先是旺一家每夜有赤光上騰如火麟產後其光不見其狀遍體鱗紋色青黑玉頂光潤氤氲若雲氣然口

紅色領下有髯頂皆細鱗具九孔臍以後具六乳一字排列背腹皆巨鱗橫列長而稍方腹下微紅其腰脊近尾處一巨鱗上有橫紋五豎一如王字形尾皆細鱗尾稍一全鱗裹毛四足亦細鱗近蹄二寸無鱗惟直紋二三見而已甫生聲如洪鐘衆咸指爲怪斃而瘞之越日鄉人殷士望等聞知往啓而濯之傷悼良久繪爲圖郡侯龍溪王公應麟命瘞于北岡山二賢祠左又二十五年春旺之族家牛復產一麟其牛卽前產麟者之子也麟狀大如前麟後有毛目赤若

流丹額有紋如王字近蹄細鱗尤整密餘皆同前生  
數日死亦葬北固山爲雙麟塚五歲再育麟亦近古  
未有

以蟲爲食

陸璣廣要云。蜩亦蟬之一種。形大而黑。昔人啖之。又謂南人照蟬取而食之。冀越通云。雲南廣南順城諸府俗好食蟲。漢書尉佗獻文帝紫貝五百。桂蠹一器注。桂樹中蟲。潰以蜜而食之。蘓林曰。漢嘗以獻陵廟。載以赤轂小車。老學庵筆記。廣人于山間掘取大蟻卵爲醬。名蟻公醬。此卽禮所謂蜺醢。三代以來固以爲食矣。然則漢人以鼃祭宗廟。曷足怪哉。朝野僉載嶺南苗獍好食蜜唧。卽鼠胎未瞬。通身赤蠕。

者。飼以蜜。釘之筵上。瞬瞬而行。以筯夾取。啖之。唧唧作聲。故曰蜜唧。可談云。瓊管獐人食動物。凡蠅。蚋。草蟲。蚯蚓。盡捕之。入截竹中。炊熟。破竹而食。乾膜子云。劍南東川節度使鮮于叔明好食臭蟲。時人謂之蠅蟲。每令人散採。拾得三五升。卽浮之微熱水中。以抽其氣。盡以酥及五味熬之。卷餅而啖云。其味甚佳。詞林海錯云。曹大家東征賦。登巢椽蠹。胡人燂蠹。中國亦有取蜂蠆爲醢者。卽古人登巢椽蠹之遺意。陸璣疏云。蜉蝣謂之渠畧。似甲蟲有角。大如指。



長三四寸甲下有翅能飛夏中陰雨時地中出今人  
燒炙畋之樊光曰是糞中蠋蟲隨雨而出朝生而暮  
死 前蜀志云劉隱者成都人也少時常賣西川監  
軍使書于黔巫之南謂之南州州多山險阻道路荆  
棘貴賤皆杖策而行將至南州州官致書迓之有一  
人背籠而來將隱入籠內掉手前往凡登山谷俱絕  
高深用指爪攀緣寸寸而進至則謁諸大校逢迎意  
良厚于是烹一犢兒先取犢兒結腸細煮置盤器間  
徐以醬調入醯中方餐犢肉彼人謂細糞爲聖葢非

此味則賓筵不具也然後下麻蟲裹蒸裹蒸者乃取  
麻蕨蔓蟲如今之刺蓀者以荷葉裹而蒸之故名其  
他風俗多與蜀中殊 袁中郎醉叟傳云楚西荆漕  
之間有一異人着七梁冠身衣錦繡狀甚奇古腹如  
斗大鬚長尺餘若五十許人皆呼之爲醉叟隨行惟  
一弟子手携黃竹籃籃中盡貯乾蜈蚣蜘蛛癩蝦蟇  
及一切蟲蠃之屬人或窺之無不駭走問其所畜諸  
毒何故答曰天寒賴以佐酒此物亦非可卒致也市  
中童兒爭覓毒蟲數十種見異人飲時悉以供與皆

擘而生嚼之如得未嘗若噉其蟲之極細小者輒浸  
杯中頃之與酒俱盡蜈蚣長五六寸者則夾雜以松  
栢枝葉去其鉗生置口中赤爪爭爭蜿蜒鬚髯之際  
觀者股慄咸大怪之多有惶怖逃去者異人恣意飲  
陷似有盈味嘗曰蠍味最美惜南方所無蜈蚣亦佳  
味又次于蠍蜘蛛則以小者爲貴諸蟲中惟螳不可  
多食多食悶人一日之間嘗過十餘家飲更不穀食  
盡日沈酣而已或于古廟中醉臥三日五日或宿人  
家屋簷下口中常提萬法歸一一歸何處八字行住

坐臥斯須不忘言人往事率多奇中人以苛禮相苦  
便欲出門及置酒又復欣然乞一醉然後去也